

WEURDJE VANNE VORST



Op 22 april zal het al 20 jaor geleeje zeen det **Toon Hermans** oët Sittard gestorve is. Toon waas en is veur mich nog altiëd ein van de allerbèste kabaretjees oëjts. Eine mins dèe mèt get simpel weurd get boëtgewuuëns kos make, of det noë ei leedje, ei versje of ei verhaölke waas. Ich bèn op 11 janewariej ôs Prinsezitting begos mèt ei gedichtje van Toon, en det wil ich ouch gèer in dees gezèt doen. Ei versje euver karnaval ... >>>

Dao is waat mich betrefj veur deze kiër, veur dit weurdje vanne Vorst, al mèt gezag. Geneet en laot geneete. Geneet van dees gezèt en van de vastelaovesdaag diej kòme gaon. Laot uch gaon en zèt de zörg ins efkes aane kantj. Diej anger daag in het jaor kriege diej zörg al veul te veul aandacht. Val mer ins nao bove, deze karnaval. Val same mèt ôs allemaol inne bliejheid!

**Jeugdraod Alaaf!
Rabbedabbers Alaaf!
Kinder Alaaf!**

Vorst Mark

*dao is geine aangenamere val
den eine karnaval
de vils namelik nao bove
het is eine val in bliejheid*

*het duffe snaor
det dich bindj
aan het monotone
springtj kepot*

*de vats ein pint
de vats ter 2, 3, 4
de vats ei vaat
en de sleut heet geine vat mië
op dich*

*het spettertj meziëk
in de smaal straote
het rëgentj kusse
in het werme kaffee*

*de dansts, de duis, de dartels es
ei kindj
de bès zigeuner of prins
potkachel of sjeemerlamp
en de bès... dichzelf*

*de òndèks de zin van de ònzin
en esse neet oppasts
hòbse es de vaste begintj
vaste verkiëring*

*ich hób nao deze karnaval
zoë ein beerlocht in miëne jas
diej snoëf ich telkes op
en dink: waat waas det lekker!*



43^{ste} jaorgank



MÈT IN DEES EDISIE

- Kòplementedaag 2019 levertj weer verrassende rizultate op!
- Groëte strijd òm Kinderse keesbuim!
- De naoweeje van het OLS 2018!
- Wildjgruj reklaam op 't Dörp binnekort eindelijk ònger kòntrol!
- Matsj G-tiëm MNO – Rabbedabbers weer verkoch!
- De skaaj is de limit in Kinder!
- Goërterhuuëskesstroat amper lèefbaar!
- Kinderse influuwensers doen het dich veur!
- Kinder Mèt Make!
- De Kinderse Kaanon!
- UNIZO awards 2.0!
- Stjuuwards aane Maas dringe euverlast trök!
- Subsidiekraan Kultuur ouch toëw in Kinder!
- Eisbaer VIP kumtj nao Kinder!
- De Baer 2020!

... en nog veul miër sjëele zeiver!

PROKLAMASIEJ PRINS SVEN I



Gedaon te Kinder inne sporthal oppe 43e
prinsezitting van 11 janewariej 2020 door ugge 43e
groëte prins van de Rabbedabbers van Kinder,
Graaf vanne Brenjerstraot, Hertog vanne
Hagendoren, Baron van sjakelëer tot plao,

Mèt
de
grasiej
vanne
Veurzitter
en miëne
veurgaondje Prins,
mèt de zèege vanne aod-
prinse verklaor ich hiejbiej
vandaag miën èllef punte.

Ugge euvergelökkige **Prins Sven d'n 1e!**

Miën leuze veur dit jaor
zal dèn auch zeen:

*Zitj het ins tege, bèsse
ôngemeujdj, krank
of wèers: verlees
den noëjts de
mood! Achter de
wolke sjientj
de zôn, alles
kumtj
altiëd
good!*

TEN IËSTE: Ich, Sven Beelen, bèn
vandaag zoë gruuëts es get. Want ich
maag uch vertëlle dèt ich dit jaor door het
lèeve kan gaon es de 43e groëte prins vanne
Rabbedabbers van Kinder es: Prins Sven d'n 1e!

TEN TWIËDJE: Achter eedere sterke mins stuit ei sterk
vrouwmes. Aan mien ziej stuit dit jaor: Prinses Evy de 1e!

TEN DÖRDJE: Het leger is ein passiej van
mich, jaomer genôg hób ich daoveur neet de zjuste
lichaamsbôw! Mer mèt de karnavalsdaag bèn ich de
generaal, en doon ich de kazerne 4 daag tôw!

TEN VEERDJE: En ôm in het legerteema te bliëve, en toch
efkes het felgreun door kaki te vervange! Zal ich de slók veur de stoet
mèt de zjeep gaon hole, ich hób mich de remork al aan gehange!

TEN VIËFDJE: Viltj mèt de stoet eine traktaör of eine generator in pan, of is
ter örges mechanisse eelenj! Geine paniek, ich los det op mèt dees 2 magisse henj!

TEN ZËSDJE: Weurdj het mich efkes get zwaor, den pak ich miën gèerd ôm get
vèskes te gaon haoke aan eine viëver of eine pool! Ich vinj det prachtige biëste! Dao
kôm ich tot röst, iedejaal veur de batterieje op te laaje veur al diej karnavalsfiëste!

TEN ZEEVENDJE: Ich kïn miën eige grenze en bèn noëjts zoë vanne
kaart det ich miën sjoon neet mië kin strikke! Esse dich mèt de vastelaovendj
get te ziër leuts gaon, dink ter aan: neet nèeve, mer in het pötje mikke!

TEN ACHSTE: Mèt hiël get luj oët Kinder deil ich de leefdje veur de relliekros: lekker vlamme en
raoze! Es technieker van Team Zuidam zeen ich regelmaotig aaf, es ter weer eine meteur heet opgeblaoze!

TEN NEEGENDJE: Aaf en toë help ich miën Prinses Evy, es diej heur patisseriej stuit te bakke inne keuke! Mer oh
wee es ich zoë eine kook laot mislökke: den puktj ze mich mèt nao de slaopkamer, boë ich ei flink pötje maag... beuke!

TEN TIËNDJE: Op 23 fibrawariej is het groët fiëst, den trèktj de stoet weer door Kinder
en stuit naoderhandj de Bunker weer wagewiëd veur uch ope! Gèe höbtj nateurlik
dèe en anger vastelaovesdatums in ugge agenda staon, maag ich hope!

TEN ÈLLEFDJE: Karnaval veere, det duise neet allein! Eederein verklëdj en gooj zin, eueveral
same gans oëtgelaote! Kôm ter massaal oët, in kaffees, zale, op pleine en langs straote!

PROKLAMASIEJ JEUGDPRINSEN LUCA I & SEM I EN JEUGDPRINSES JENTHE I

TEN IËSTE:

Wèe

zeen Luca
en Sem, zone
van Petra Thijs
en Roland Dirks, en
breurkes van Tessa! Mer
vanaaf vandaag maag eederein
ôs aansprèeke es Jeugdprins
Luca d'n 1e en Sem d'n 1e!

TEN TWIËDJE: En ich bèn

Jenthe, dochter van Kim Brouns en
Hendrik Neyens, en zöster van Linde!

En vanaaf noë tot volgendj jaor rëndj deze
tiëd, heit ich Jeugdprinses Jenthe de 1e!

TEN DÖRDJE: Geluif het of neet, wèe zitte neet

inne zelfdje klas oppe sjoël, ich zit bij juf Vivi, en mich
heet meister Bert gelaaje! Dao is door d'n directeur aardig
lank euver naogedach, zoë kinne wèe hum same neet begaaje!

TEN VEERDJE: Danse is miën groëtste passie, den kôm ich
hiëlemaol tot lèeve! En es ich zoë nao dèe raod van ëllef kiëk, is het
d'n hoëgste tiëd det ich hun ins eine kursus soepel bewèege gaon gèeve!

TEN VIËFDJE: Moërepetaazie mèt kïpkorn, det is

mèt de vastelaovesdaag miën kulinèere eis! Bah, nèe, veur
mich gèer spèerribs, zeker neet van det gemaale vleis!

TEN ZËSDJE: Bij de Chiro weurd het ouch ei karnavalsjaor!

Mèt 2 Prinsen en ein Prinses kriegtj de leiding het nog zwaor!

TEN ZEEVENDJE: Profvoetballer, det is miëne groëtste droum en
ich zeen mich de belkes al binneknalle! Waat ich es ich groët bèn wil
wèere, det zeen zörg veur later. Iëst mer ins volle bak karnavalle!

TEN ACHSTE: Door mama en papa hób ich sins ich hiël klein waas de
karnalmikroob mèt de paplepel kinne binnespaaje! Bij de Sjaaimakers en noë
ouch bij de Rabbedabbers kinne ze ter van op aan: mich höbtj gèe gelaaje!

TEN NEEGENDJE: Mama en papa deeje het es groët Prinsepaar in 2016 ouch hiël good!
Zjust wiej miëne peter, Aod-Prins Danny den 2e, het karnavalle zit dus zeker in ôs blood!

TEN TIËNDJE: Veur det wèe aan ôs leuze kôme, zèg ich es Jeugdprinses: dit jaor zeen de vroluu
bjôs baas! Papa is mèt de karnavalsdaag sjeffaör, en mama, Linde en ich gèeve gaas!

TEN ËLLEFDJE: Ôs leuze veur dit jaor zal zeen:

*Kinder, gèe kintj 'r in 2020 veur de volle 100% op vertrôuwe!
Mèt dit XL Jeugdprinseteam gaon wèe ei XXL fiëstje bôuwe!*



Prins Sven I & De Rabbedabbers bedanke dees hanjelèers veur hunne steun

- Sanitair Erik Brouns
- Danny Kunnen – KD Interieurbouw
- Ellen's Hairdesign
- Frituur 't Simpelke
- Aardbeienkwekerij Royakkers Albert
- Tholen Ine Verpleegteam Bree
- ADS+ BVBA
- Radio Monza
- NG Hairstylist
- JEKO
- 't Rond Punt
- Algemene Kitwerken Jacky Neyens
- Press & Paper Clips
- Tattoo Jos Breukers
- Vanwijck Tony Sanitair en CV
- Sportcafé De Schans Bakkerij M&M
- Zakenkantoor R. Theijbers
- De Bakmiep LS Car Service
- Café De Grenshook
- RAKOMA
- MCG Racing
- Aardbeien Royakkers Jan en Gijs
- Vangeloven Agri
- Bistro Chéz Vie
- Steengoed
- BNP Parisbas Kinrooi
- Chocolade Atelier
- Afwerkingsbedrijf Carpentier
- Grond- en Waterwerken Heymans
- Bouwwerken Dirk Christis
- Coolen Theo Transport
- Kinesiste Stefanie Joosten
- Schrijnwerkerij Steensels Patrick
- Thuisverpleging Cura
- Tony's meubeltje
- Café De Limburger
- Saint Mac
- Schoonheidssalon Maryeskai
- Kine de Goort Wendy Beijnsberger
- Bouwwerken V&R
- Fietsshop Vandewal
- Garage Brouns
- Maco Elektro
- Petroleumproducten Segers
- Lunchbox
- Bandenschop Kinrooi
- Begrafenisonderneming Vancleef
- VDS Electronics
- KARO – Bosmans en Co
- Easycom Computers
- Traiteur Peter Cremers
- Belfius Kinrooi
- Domen Drinks ING Kinrooi
- Amesco
- Amerikaanse Stock Geelen
- Tentenverhuur Jan-Arie De Jong
- Frituur 't Hapje
- Keukens Vanthoor Eddy
- Nachtwinkel 't Dorp
- BP Interieur Design
- Verzekeringen Teuwen Stefan
- Schrijnwerkerij Smeets M.
- Sec. Poorten Peter Kuypers
- Afwerkingsbedrijf Baens
- AVEVE Verbeek
- Fietsen Henkens Eric
- Marc Segers
- RS Photography
- Haarstudio Suzy
- Boekhoudkantoor Zontrop
- Bloemencreatie Monique
- Willen Security
- Segers Snacks
- Algemene Schrijnwerkerij Jacky Houben
- Dierenartspraktijk de Morée - De Clippeleir
- Optiek Raquel Staeren
- Stukadoor L. Houben
- Apotheek Peeters
- Kapsalon Madeleine
- Kinesist Loyen J.
- Openhaardenbouw
- Garage Vandervecken – Sterkendries
- Marisa Di Girolamo
- Verheyden Electriciteitswerken
- t Stampertje
- Herenkapper Piet Verstraeten
- Linssen Stan Verzekeringen
- Naaimachines Janssen H. Kapsalon Brigitte
- Garage Winters
- Dierenartspraktijk Bruckers Verzekeringen Schaeckers
- Henri Ceyskens Inox
- Kapsalon Marie-Therese
- Kinesiste Ilse Jacobs
- Notaris Debucquoy
- Spereco - Mecano Play
- Dr. Bullen
- Frituur GiGi
- Melkveebedrijf Hoeken LV
- Rijschool Het Maasland NV
- Tandarts Vanende M.
- Café Sport
- Fotocieniek
- Bakkerij M&M
- Chocolade Atelier
- Frituur 't Hapje
- Gabriëls Transport
- Melkveebedrijf Linssen-Beckers



*Het is mèt door ugge steun
det de Kinderse karnaval
kintj bliëve bestaon!*



Kômplimentedaag 2019 levertj weer verrassende rizultate op!

Eeder jaor op 1 miërt isset kômplimentedaag. Dit jaor is det op eine zôndig. Op diej jaorlikse hoëgmès vanne kômplimente is het de bedoeling det 't euver kômplimente geit, det is nogal wiedes. Wèe vanne Rabbedabber trokke ter al ins op oët òm hiej en dao ins te polse nao waat soort kômplimente ter zoë-al lèeve in òs Kinder. De rizultate wore verrassendj!

Marc Voortmans vindj det Lut mer eeder jaor veul kômplimente heet es het geit òm het keeze vanne reisbestumming innet groët verlot. "Dao is het te werm, dao is het te naat, dao twiëfel ich of het èete waal good is, det is te deur, det weer te goojekoup... Het is altiëd get. Dit jaor op 1 miërt gaon ich het heur ins good zègge: of de geis zwiëge, of wèe

gaon gewuuën nao Senter Parks in Pèer!"

Ivo Vleishouwers en Maddy Piëters vanne Veurzörg, en Pascal Corten vanne CM, verzoëpe inne kômplimente. "Dao kumtj hiej zelde eemes binne veur get anders es kômplimente. Piën inne rök, piën inne kneuk, piën aane goesting,... det is al waat de klok sluit. En es het den ins veur get anders is, môtte ze dèk gewuuën mer get stikkerkes hóbbe!"

Pierre van Radio Monza vindj den weer det Mathy Vandewal aardig get kômplimente heet esset weer ins Dialektjoëtzending is. "Dèe meniër kumtj hiej eine kiër in 't jaor ins dreije, en den is dit neet good, en det neet good. De mikro's zeen verslete, de steul zeen te hël,



de kômpjoeter zitj vol virusse. Esser meindj det het op ein anger bèeter is, det geit 'r mer dreije op LRM!"

Jack en Thieu Christis weite neet good waat ter mèt aan te vange, dèe kômplimentedaag. "Kômplimente hóbbe wèe òngerein neet echt, of het môt zeen det Jack zië beer gèer in ei tulpke drinktj, en ich in ei fluitje. Mer òm det noë kômplimente te numme: nèe...," aldus Thieu.

Boë kômplimentedaag eeder jaor weer volle bak weurdj geveerdj, is bij Sandra en Steve van Frituur 't Simpelke. "Den zèg ich d'n hiëlen daag door wiej spisaal Sandra waal neet is veur mich," vertèltj Steve hiël smakelik. "En saoves pakke wèe majenèes, ketsjup en uuënje mèt nao bove, en den gèef ich Sandra ein hiël spisaal beurt!"

In memoriam

Het is neet van òs gewuëntje òm in òs karnavalsgezèt in het lank en het breid stil te staon bij de luj diej òs gaondewèg òntvalle zeen. Karnaval is ein lach en ein traon, en ouch in meujlikke momente stuit eine karnavalist klaor veur d'n eine d'n angere. Es eemes dèe van kortbij of wiejeraaf get mèt de Rabbedabbers te make haaj, kwaam te sterve, stông det respektvol en zônger sjèele zeiver bij de witj-gèedjetjes. Het aafgeloupe jaor echter, is de Kinderse karnaval op eine slaag hiël zwaor getroffe. Det is missjien òrges logis esse al bekans 44 jaor bestuis, mer het kumtj toch hël aan.

Marleen Peeters van Jean Knippenberg waas jaorelank lid vanne dames vanne raod. Heure Jean, Prins in 1989, waas heur alles, en zië waas alles veur hum.

Jef Vandewal, bèeter bekindj es Jefke vanne lat, waas jaorelank ein van diej belangriëke sjakels achter de sjerme. Gei lid, mer eine echte simpatizant. Opbôwwe, aafbrèeke en bônneverkoup. Take boëveur desse dich wegsijfers veur de vereniging. En presies det heet Jefke altiëd getipeerdj!


Thieu Droushoudt is in het verleeje jaorelank lid gewèest vanne

Raod van Èllef. Hèe woëndje bônk aane karnavalsloëds oppe Raomdiëk, en hèe waakdje dao euver wiej eine gooje hoësvader.

Danny Jaroszewski waas lid vanne Rabbedabbers van 1998 tot 2018 en in 2009 waas hèe òzze groëte Prins. Danny haaj hart veur de vereniging en heet ter mèt ziel in gelag. Lid, Prins of òngerveurzitter: det mook veur hum niks oët. Ziën take volbracht 'r altiëd tot inne puntjes.

Wèe zulle uch misse. Wèe zulle uch noëjts vergèete...

Subsidiekraan Kultur ouch tôw in Kinder!



Es het in Brussel rëgentj, dröppeltj het in Kinder. Ouch hiej geit de vinger oppe knip kwa kultuursubsidies. Wêe zullen het mèt hiël get minder môtte doon strak. Het sjikste van al: het is de noëwe sjepe van kultuur dèe verantwoordelik is veur det drama! Van d'n eige lede môsse het hëbbe. Wêe vanne Rabbedabber laote ôs echter neet moëlkörve, en trokke – gewaopendj mèt ôs perskaart en eine lange tekst euver persvriehaid – nao het Dörp, en ging **Mark Hoedemakers** ins flink aane tandj veule.

Rabbedabber: Effe geine zeiver. Oët gooje brôn weite wêe det de kultuursubsidies ouch in Kinder fors wêere bij gestêldj. Lèg ins oët!

Mark: “Kloptj wiej ein bös. Dèe Jambon is den waal van ein anger strèkking, mer esse geliëk hëbs, hëbse geliëk. Dao zitj veul te veul vèt aan het verke. Het môt mer ins gedaon zeen mèt aane iëste mem te hange. Good is good! Ten iëste is oppet gebeed van kunst de hëlftj gewuënweeg brol. Ich môt hiej eederen daag tege det sjevaakel oppe rotonde aan kiëke. Is det kunst? Diej brikke paöl

zeen op zich nog neet zoë liëlik, mer dèe witte derm dao door?! Boë sluit det in godsnaam op? En den môsse dao zoëveul veur niër tèle?!”

“Ein anger zaak zeen diej dekadente vergaderinge en fiëste van eine houp vereininge. Allemaol klage ze stein en bein det ze teveul oëtgave hëbbe en te weinig inkômste. Mer den waal de groëte jan oëthange op vergaderinge. Mèt kaviejaar en sjampajn. Diej bestuurslede vanne Landelikke Gilde wêere eeder jaor weer eine kilo zwaorder. Wiej kumtj det dinkse? En den dèe **Né Lantmèeters**, dèe goëjtj mèt de sente vanne belastingbetaler! Prizenteertj de kwis vanne Brookhook tegewoording al mèt eine gouwe mikro! Det hëb ich mèt miën eige ouge gezeen. Hèe hultj hum zelfs vas wiej eine ruige rokker.”

“En den zeen ter nog diej kultuurdosseers, diej de vereininge eeder jaor môtte invölle ôm geldj te kinne kriege. Ein sjanj! Det misbruuëk det ich dao-al in bèn tege gekôme! Dao weurdj mich get aafgeloge! Ich dreij de kraan toëw!”

Rabbedabber: Gèe huuërtj het, dao is get oët! Es ter bespaardj môt wêere, zeen diej kulturele vereininge nateurlik stök veur stök slachtoffer. Wêe ginge ins loëstere bij ei paar gedupeerdje... **Studentevereining De Bokkerieers:** “Waat teveul geldj? Dèe kwibus wètj neet waat



'r zeet. 75 euro in 't jaor, des al waat wèe kriege. Esse allein al kiëks nao ôzze kulturele oëtstap van veurig jaor nao Oekraïne. Det kostj dich stökke van minse. Mèt eine lapdens veur **Frederik Vandeweyer** waas diej hiël subsidie van 75 euro ter al door. Diej halve liters, dèe glorie hool, diej ribbe in det restoraio: al zelf kinne dokke. Dikke sjanj. En den zègge det wèe zoëveul trök doon veur de gemeindj op ei jaor. Of dinkse det zoë ei zangfiëst zoëmer oët de locht kumtj gevalle?!"

Fômfaar de Vrijheidszone zuuët de zwarte snië al inne locht hange. **Piet vanne Pepel** is formeel: "Es det ter door kumtj, stoppe wèe vandaag nog mer eeder jaor eine konzèer. Den is het vanaaf noë mer ôm het anger jaor! Zèk det ich het hōb gezag: d'n iëst volgendje is pas in 2021!"

De Chiro veertj normaal gezeen dit jaor heur 60-jaorig bestaon. Mer det plan is ôngertösse vanne baan. **Jay-Dee Breukers**: "Wèe slaon det euver en wèe gaon drek veur de 100 jaor. De gemeindj is trouwes nog altiëd neet langs gewèest veur hiël ôzze boëte

aanlèg! Ich zouw mich nog gei bitje sjame, in heur plaats!"

Es det mer good kumtj. Gelökkig is zeen wèe, Rabbedabbers, nog zelfbedruuëpendj. Mer: de sop weurdj zelde zoë heit gegèete es det ze gesjônke weurdj. Het zal oëteindelik waal weer mètvalle. Laot het ôs mer hope!



Wist gèe det...

... 33 jaor geleeje, in 1987, **Toine 1 Heymans en Mia 1 Kerkhofs** het Prinsepaar van Kinder, en **Danny 2 Kunnen en Linda 2 Bokken** het Jeugdprinsepaar wore.

... 22 jaor geleeje, in 1998, **Dominiek vanne Bôndj** groëte Prins waas, en **Mark 2 Janssens en Isabelle 1 Bervoets** Jeugdprins en Jeugdprinses wore.

... 11 jaor geleeje, in 2009, **Danny 2 Jaroszewski en Evelyne 1 Vaesen** es Prinsepaar, en **Seppe 1 Vanwijk en Lotte 1 Moonen** veurop ginge es Jeugdprinsepaar.

... **Marissa Di Girolamo** dit jaor is oëtgerope es **Ridder inne Orde vanne Rabbedabbers**. Marissa is eemes diej ôs al ferm heet geholpe, ônger angere mèt ôs hiël papperasse veur de vzw. Dao waas geine eine Rabbedabber bekwaom veur, dus heet Marissa ôs oët de noëd geholpe! Ouch is Marissa eine ônmisbare sjakel in de wirking van het Kinderse G-Voetbaltiëm, ein ploog boë wèe eeder jaor veul plezeer mèt moge make! Marissa: dich bès ein oët doëzendj!



De Baer 2020!

Het karnavalseizoen 2019-2020 is ouch ei bitje de geboorte van 'De Baer'. Genumdj nao **Hubert** (Baer) **Maessen** oët Biësel en zoë-geet de godvajer van de karnaval in ôs fusiej Kinder. Baer is neet allein stichtendj lid vanne Gaaplepels van Biësel, hêe is ouch al sins jaor en daag ein van de driëvendje krachte binne FEN Vlaondere (Federasiej Europese Narre). Baer kumtj minstes ei paar kiër in het seizoen bij eeder karnavalsvereniging oët ôs dörp langs es provinsjaal FEN kommisaris. Ôm ei weurdje te zègge, ôm dekorasies of medaalies oët te reike, of gewuuën ôm same mèt te geneete van waat wèe allemaol paraat make. Eine karnavalist in hart en neere, eine werme mins en eemes dèe mèt de binjing is tösse **Ertesjieters**, **Zweitzökskes**, **Gaaplepels** en **Rabbedabbers**. Eederein draagtj

Baer op henj!

En sins dit jaor is Baer dus ouch eine karnavalstrofee in ôs fusiej! Ei bitje geliëk de Zjeng in Mestreech, of nog groëter de Orde van de Gulden Humor in het Limburg aane angere kantj vanne Maas, mer toch weer ei bitje anders. Kleinsjaliger, presies op maat van ôs dörp mèt heur 5 kirkdörpkjes, mer doaveur neet minder es diej angere!

Allemaol good en waal, mer wèem kintj dèe 'Baer' noë kriege, huuër ich uch al dinke. Gooj vraag! 'De Baer' zal eeder jaor wèere oëtgereiktj aan eemes dèe aan volgendje kriteeria volduit:

- De Kinderse karnavals-, vastelaoves- en volkskultuur mèt leefdje en respekt oëtdrage
- De gooj verstandjhaojing tösse de versjillendje vereniginge mèt



beware en bewake

- Eine doëdgewuuëne wuiles zeen tösse de doëdgewuuën wuilesse

Es dao eeder jaor eemes aan volduit, zal ter eeder jaor weer eine 'Baer' zeen dèe weurdj oëtgereiktj. Es wèe echter neemes treffe dèe ter bovenoët stiktj, den slaon wèe zônger veul tamtam ei jaor euver.

Dit jaor, bij d'n alleriëste 'Baer' is **Roger 'de kapper' Van Eijgen** oët Biësel lourejaat gewore. Roger is eine rasechte Biëselèer, dèe al jaore Gaaplepel is en dèe zich altiëd van ziëne bèste kantj leutj zeen es het geit ôm optreejes of het verzinne van tekste. Dit jaor is ter in hiël Kinder eindelijk doorgebroke mèt de hit 'Pintjes Drinken bij Thalia', en det nummerke is oppe slaag eine evergriën. Wèe dinke det Roger Biëselse volksgesjiedenis heet gesjreve mèt het prachtig leedje euver ei terraske doon op eine heite zomerdag.

Wèe vanne Rabbedabber ginge ins langs bij de versjillendje hoëfdrolspeulers van 'De Baer 2020', en vroege hun veur ein korte reaksiej.

Boëswildj, ieniesjatiefnummers:

"Wèe zeen wèem wèe zeen, en wèe doon waat wèe kinne. Eine mersie op tiëd en stôndj duit dèk hiël veul, ouch inne karnaval. Wèe hope det deze trofee nog lank maag wèere oëtgereiktj, en hope det wèe ter op diej meneer veur kinne zörge det de luj diej de karnaval mèt oëtdrage, in eige dôrp en in anger kirkdôorpe, ei waalgemeindj sjouwerklopke kinne gèeve."

Baer Maessen, liëjendj veurwerp:

"Minsleef, waat ein iër det ich

neet allein Baer oët Biësel, Baer vanne FEN met noë ouch 'De Baer' bèn! Toen ich de vraog kreeg ôm miën zèege te gèeve veur het make en het oëtreike van dèe priës, sjoot ich vol wiej eine vaajer dèe ziën dochter zuuët trouwe. De traone bengeldje mich euver de wange, en dröppeldje mich op miëne pas gewasse FEN-jas."

"Ich vinj het sjik det ze neet hōbbe gewachtj tot ich eine mèeter tachtig ônger de grōndj lik, of tot miëne ummer asse (jao, dao zal hiël get asse van mich aaf kōme es het zoë wiëd is, geluif mich mer!) klaor stuit ôm bij eemes oppe kast te wèere gezat. Het minste waat ich kin doon vanaaf noë, is ter veur zörge det ich eeder jaor de trofee zelf mèt kōm oëtreike. Beloofdj!"

Dirk Reeskens oët Nerootere, ôntwerper:

"Ich hōb het mich al flink beklaagd det ich jao hōb gezag toen ze mich vroege ôm det dink te make mèt miëne 3D-printer. Get make, tot dao aan tōw, mer dao waas gei plan, gein tekening of niks. Allein get gekribbel op ei stōk pepeere taofellake! De zoogs de vlekke van het beer ter nōg op!"

"Mer good, ich aane slaag en mer zelf ein tekening beginne make oppe kōmpjoeter. Oore en oore aan gewirktj en den dinkse: "Good, Dirk. Good bezig. Diej gaon kōntent zeen!" Mer niks waas minder waor. Det heudje waas neet good (tot 11 kiër toëw!), det buuëkske mōs dikker, enzoëvoort. Dikke mizeriej, blijen toen het aaf waas."

"Ôm ei lank verhaal kort te make: 5 ore geteikendj en den de printer aan gejoektj. Nao ein bevalling van 15 ore is den 'De Baer 2020' gebore. Hèe waas 18 centiemèeter

groët en maaktje het drek good."

"Het good noëts is: volgendj jaor pas ich det jaortal aan, zèt ich het messjen op en lèg ich mich oppernoë veur d'n tillevisiej. Het groëtste leid is geleeje!"


Roger de kapper oët Biësel, winnaar 'De Baer 2020':

"Iëst en veural wil ich ma bjōs bedanke. Diej goddelikke stum hōb ich van heure kantj vanne familie. Ouch het talentj ôm op het iëste zicht niks zèggendje tekste te sjrieve zitj in heure DNA. Het liëf hōb ich den weer van pa bjōs. Det is missjen neet goddelik, mer ich bèn toch gezèegendj mèt ein aardig groëte basboks rōndj miëne navel. Det helptj dich ei pak veuroët, det kin ich dich zègge."

"Wètse, het geit bij het sjrieve van zoë eine tekst kumtj het ter op aan ôm veural gemakkelikke weurd te gebruuëke, te zinge euver zake diej de luj kinne en ôm liëgdrempelig te zeen. Waat melodieje betrefjt is het nog gemèekelikker. De zeuks get waat eine angere heet gemaaktj en waat ter mèt door kintj, en de piks det. Eine kleine kintj de was doon!"

"Ich bèn echt gruuëts op het feit det ich d'n iëste 'Baer' oëjts hōb gewōnne! Veural ômdet ich ouch hiejdoor de erkinning krieg es kreejatief brein van ôzze bend 'Van Alles Get'. Meistal geit **Ruud van Lenaerts** mèt alle aandacht loupe, en staon ich ter mèt **Wiel van Bruckers** get bij veur sjōppe zeve, mer deze kiër dus neet!"

"Het minste waat ich kin doon is het beeldje ein sjoën plaats gèeve in miëne kapsalon. En nateurlik gaon ich ouch eine gooje gèeve, neet in het minst aan diej wuilesse van Boëswildj! Bij Thalia nateurlik!"



Flitse van oppe Kinjerzitting!



Coca Cola kammejao Mezeik veel dik tege!



Het is neet van ôs gewuuëndje ôm noëts te bringe van boëte ôs fusiej, mer sôms hange de zake zoë aanein mèt gebeurtenisse oët Kinder, desse waal ins de snoët aan het vinstere môs gaon stèeke bieje ôs buurstede. Veur dees frats ginge wèe efkes nao Mezeik. Neet gèer, mer waat môt, det môt!

Marc Vereecken sjepe van god-wètj-waat-allemaol van Mezeik is nôt op ôs, es wèe zègge det wèe van Kinder zeen. “Zwiëg mich euver Kinder! Dao zitte ter dieje ôs eine ferme kloët hōbbe aafgetrokke! In desember haaje wèe hiej ein sjikke sjaatsbaan oppe mèrret, ein prachtige après-ski bar ‘D’n Iësbaer’ en ouch eine daag de groëte Coca Cola kammejao mèt de keesman. Iëst snoepe ze ôs de VIP-versiej vanne Iësbaer aaf (lès: Eisbaer VIP!) Dao kôs ich nog waal mèt lache. Wèe wille toch al ei tiëdje van dèe naam van dikkenakke aaf... Mer det dèe groëte kammejao neet bjôs oppe mèrret, met bjuch in Kinder stōng (lès: Jan Moubax 90 gewore!): det ging ter zwaor euver!

De hiël mèrret zaag zwart vannet volk, eederein door het gek hèer. Dreijjt mich dao geine kammejao, mer ein sjèemel kammejonèt op!!! Jung begoste te beuke, mooders wore lèstig, eine houp trammelant! Det waas mich ein teleurstèlling van het kintj neet mië... En den geise ôm oëtlèg vraoge, zègge ze dich iëskaod: mer meniër, ôzze groëte kammejao stuit op ein 90-jaorige tōn in Kinder. Geluif mich: den viltj dich de bōks oët!”

Jan Moubax, d’n dader van dit alles, reageertj op zië Moubax: “De weurs mer eine kiër 90, dus ich hōb ouch get kollega’s van vreuger genuuëjdj. Esse bedinks det ich es brouwer indertiëd Coca Cola hiej nog geholpe hōb voet aane grōndj te kriëge... Dieje wore zoë kōntent det ze op miën tōn mochte kōme det ze mich zachte: Jan, wèe kōme mèt de groëte kammejao! Kin ich ter get aan doen det dieje luj mich nog altiëd op henj drage?!”

Zoë zeetj gèe mer, het zitj hum sôms in klein dinger. En: de kriëgs waat desse verdeens!

Mōppe

... **Sem en Luca Dirkx** zitte op ein euvervolle bōs van Mezeik nao Bree. In Opitter stappe **Lucia van Jan-Arie De Jong en Chantal Volkaert** op. “Zèk jōnges,” vraoge ze, “zoudj gèe wille opstaon?”

Sem en Luca in koër: “Jeh nèe, want den gaotj gèe op ôs plaatse zitte!”

... **Dokter Hechtermans** heet ein biejsjoëling gevolgdj, detter noë ouch amputasies maag doen. **Lei vanne Pepel** is ziëne iëste pasjent veur dieje toch waal zwaor ingreep. Hechtermans is poëpzenewechtig en zètj per ôngelök het verkiërde bein aaf! Jōng, zeet d’n dokter tege Lei, “probleemke. Het slechte noëts is det ich dich het verkiërde bein hōb aafgezatte. Mer, ich hōb ouch good noëts. Inne wachtkamer zitj **Piër Grispen** en dèe wiltj dèe sjoon op euversjoot waal hōbbe...”

... **Jaak Jacobs** kumtj ‘r nog ins oët ein geit nao de Grenshook. **Dokter Hechtermans** zaat dao ouch op het terras. Ine, de bazin, zeet opins tege Jaak: “Psstj, Jaak, dèe dokter dao, det is geine zuuëvere...” Jaak is alzelève hiël kōntent gewèest van Hechtermans, vindj het ei raar verhaol en vreugtj aan Ine: “Wiejzoë geine zuuëvere?” Ine: “Dèe mins ziën hiël pasjente zeen krank!”

Wist gèe det...

... **Stijn Goijens en Ronald Zuidam** kroënridders zien gewore inne Orde vanne Rabbedabbers. Wèe wille zoë ôs appresjasiej oëtdrökke veur alles waat dees hiëre de lêste jaore veur de Kinderse carnaval hëbbe gedaon.

... ouch **Baer Maessen**, ôzze FEN-kômmisaris, gehuldigdj is es **kroënrider**. Hèe waas efkes van z'n mèlk aaf, want wèe haaje hum det natuerlik neet op veurhandj gezag.

... **Luc Walen** is tówgetreeje es noë lid vanne Raod van Èllef. Luc heet ei groët hart veur de carnaval en heet al hiël get streepe verdeendj bij de Rappetappers en de Maasknepkes. Wèe winse hum minstes èveveul plezeer bij de Rabbedabbers!

... de **Rabbedabbers volgendj jaor** 44 jaor bestaon! En det det eine jubielee is inne carnaval van **4 x 11!**

... in det 4 x 11 jaor hiël get stuit te gebeure!

... **Marc Voortmans en Lutje Schouteden** gestoptj zien bij ôs vereiniging. En det wèe Marc bedanke veur al die jaore good zörg te hëbbe gedrage veur alle fienansjeel transaksies vanne Rabbedabbers. En det wèe hun allebei bedanke veur ei prachtig Prinsejaor in 2018!

Eisbaer VIP kumptj nao Kinder!

Gèe höbtj 'r ôngetwiëfeldj al euver gehuërdj: in Mezeik hëbbe ze deze wintjer ein Après-ski hut gezatte op Kloësterbempdje. Vanaaf het begin kwaam dao ei pak volk op aaf. Dikke ambiejaos eeder wiekendj, mer ouch mizeriej mèt zaate luj en inne wildje wèeg pisse tege gevels en oppe gazon. Mèt anger weurd: innet konsept zitj meziëk, mer ouch kans op hiël get valse note. En gèe wètj: waat eine angere good kintj, kintj eine oët Kinder bèeter!

Thomas Linsen en Ester zeen op diej ker gesprônge ein hëbbe van ei good konsept ei bèeter konsept gemaaktj: Eisbaer VIP!

In tegestèlling tot in de hut in Mezeik môsse bjun op veurhandj rizervere. Det doon ze op resterao toch ouch! Dao get maksimum 20 man in, en de dreskood is proper aan zeen. Ein geklèdje bôks en ein humme veur de manskèerels, en ei klèdje, ei deu-pjeske of ei

galakleid veur de vroluuj. Gein drindls of Tirolerbôkse: det is allein veur de deensters en garsaos.

Jan Linsen, dèe gelökkig aane bèeterhandj is, weurdj vaste tapper van deenst. Mèt diej hawf lieters môt 'r minder dèk tappe en geit het get röstiger aan. Hèe is minder fel en muktj ei pak minder leweit, en det kumptj bij de bedeening van al diej VIP's good van pas. Het lêste waase wils in ein klassezaak, is de luj tege de kop stoëte.

Het wildjpisprobleem waat detse in Mezeik aane handj hëbbe, gaon Ester en Thomas pro-aktief aanpakke. Ze plaatse genôg Diksieweesees good kortbij, det neemes zich nog de meujte geit doon ôm tege de stal te gaon luuëtere.

Wèe vanne Rabbedabber wille mer ein dink zègge: dit kintj allein mer ei groët sukses wèere! Nao de vastelaovendj gaon wèe zeker ins rizervere! Ein prosit alvas!





Goërterhuuëskesstroat amper lèefbaar!

Triestig noëts oët de Noordhook. De Goërterhuuëskesstroat is nog amper lèefbaar. De meiste luj höbbe gewuëweg sjrik òm de kop nog boëte te stèeke. Esse nao de winkel môtte, stappe ze in d'n otto inne graasj, doon ze de poort ope en rieje ze snel zonger ougkòntakt te make richting Wiertersteinwèeg. Es wèe ins inne naober langs gaon veur eine standj van zake doortj het ein iëwigheid iër wèe eemes te pakke kriëge. Toch is het òs gelòktj eemes te vinje dèe annoniem wiltj getuuëge.

X: “Dao woëne ter hiej ei paar, die zeen neet miër of minder es sosjaal gehandikaptj! Veur het minste bitje, staon ze bij dich op het gelèeg. In het bèste geval höbbe ze zelf eine bak beer bij, en in het

slechtste geval loupe ze rechtstreeks nao de frigo. Ein dink is zeker, d'n daag is òm. Of het noë inne veur- of naomiddig is: det bliëftj hange tot de zòn ònger is. En den nog. Het geit mich echt neet òm diej kòste veur diej bek beer, ich wil neet det gèe dinktj det ich eine greune bèn. Mer det vritj tiëd. Es ich op zaoterdigveurmiddig wil graas meije, en op zòndigmörge wil sjoffele, is het wiekendj òm. Gein kloëte gedaon gekrege, en twië kiër zoë zaat es ei kenòn! Het is zoë wiëd gekòme det **Roel Ramaekers** kunstgraas heet gelag bjun veur. **Ad Christis en Carine** doon zich eine boerka aan veur het graas aaf te doon, zoëdet neemes heur kintj herkinne. Triestig is het...”

Es **X** zië verhaol heet gedaon, stuuëftj ‘r snel weer nao binne.

Opins stuit Hendrik Neyens langs òs mèt ei fleske beer. Hèe begintj aan eine klaagzang...

Hendrik: “Vreuger waas het hiej toch bèeter. Eederein hing veul mië aanein. Eederein haaj nog ei aojerwèts 2-taktj graasmesjien. De huuërdes zoë of eemes inne hoof bezig waas. Eine plasticke gazòn, det bestong nog neet en ein graaspoort mós manuweel wèere ope en toëw gedaon. Ich zèk het dich: dèe techniek is get sjiks, mer het muktj ouch veul kepot! En bliëkbaar zeen Ad en Carine verhoësdj. Höbbe gein afsjeidstòn gegèeve en zelfs gaaròet niks laote weite det ze vertròkke. Noë woëne dao luj mèt eine boerka. Kriëge nog geine goojendaag van... Ich höb niks tege vreemdje, mer het môt waal van twië kante kòme!



De naoweeje van het OLS 2018!

Det het OLS van 2018 ôs gemeindj weer ins flink oppe kaart gezat heet in de 2 Limburge, det kinse waal zègge. Mer deepgaondj ôngerzeuk liërtj ôs det het OLS nog veul mië tewèg heet gebrach: eine beebieboom dèe wèe neet mië hõbbe gezeen sins de beebieboom nao de Twiëdje Wèereldjoorlog!

Wèe vanne Rabbedabber ginge ôs leecht opstèeke bij ei paar betrokkene. Te beginne bij ôzze burgervaaier Jo.

Jo Brouns: “Waat gèe zègtj kloptj. In tegestèlling tot 2018, toen het in ei woord sjèemel waas mèt de geboortcijfers in Kinder, kwame ter in 2019 aan de loupèndje bandj kinjer oët ôs vroluuj. Det heet nateurlik alles mèt det OLS

te make, nogal wiedes! Inne iëste hëlftj van 2019 zeen ter al ève veul beebies gebore es in hiël 2018 biejein. Det zeen serjeus groete oët de fiësttent, mich dunktj. Allemaol verwèktj veur, nao en ônger het OLS.”

“Het ging den ouch het hiël jaor euver sjete, gesjote en bõlkes. En

ich dink persuuënlik ouch det ter hiël get vroluuj aardig sjerp wèere van diej mega groëte bukse boë diej sjõtte mèt rõndj loupe. Det zeen nogal mesjiene en het zouw mich neet verwõnjere es det eine erotiezerendje oëtwirking heet en zõrgtj veur eine hormonale opstoët. Nèe, het waas ei sjot inne roës, det hiël gebeure!”

Sylvie Henckens oët Geistinge, sjepe van kinjeropvang, zitj mèt de henj in het haor. “Och jõnges toch! Zwiëg mich van det OLS en al diej mizeriej achteraf. En mer fiëste, en mer sjete, en Sylvie kintj ter heure plan mèt trèkke!”



“Iëst steurtj gèe mich eine houp volk nao de spoed in Mezeik toen de festiviteite aane gang wore. Zeker toen ter nao dèe fiëstaovendj eine houp volk mèt kepotte kneuk kwame lemmetere. Piën hiej, piën dao... Den haaje ze zich mer neet mèt hun zaate botte mèt de vélo inne graaf môtte rieje, gliëk eine **Henri Cleeren** of **Raf Smeets!** Wuilse zeen het!”

“En diej waat den waal zônger veul kleijersjeure en blutse aane koëj gerake, diej gaon vollebak aan hum! En dao merk ich nateurlik pas naoderhandj de gevolge van. Ôzze kinjeropvang ‘t Speulnesje is strak te klein en dao geit perseniël te min zeen! Dao stuisse den es noëwe sjepe, drek mèt de gebakke pèere. Biej eine normale aangruj en doorstrouming is ter plaats genôg in het Speelnestje. Wèe kinne toch neet aafgaon op eine heite, fiëstelikke zomer miër of minder? Det is gein meneer van wirke!”

Jean Van Eygen, d’n achteropsjôt van het winnendj zèstal vanne Raom, kriëgtj langs alle kante oëtnuëjinge van beebieborrels, duipfiëste en god-wètj-waat nog allemaol. “Minseleef, haaj ich det geweite, ich haaj det lèste bôlke mis gesjote! Ich kin de aanvraoge ôm ins langs te gaon praktis neet miër verwirkjt kriege. Ôm ter nog mer van te zwiëge det esse nao zoë eine beebieborrel môs gaon, ter ouch eederskiër ei kèertje mèt get geldj mèt môt. In ‘t begin vinse det sjik, det de luj dich

aansprèeke. “Jean,” zègge ze mich den, “gèe hōbtj veur zoë eine gooje vaajb gezōrgdj in hiël het dōrp, wèe wore dao zoë good gezindj van eederen daag, det wèe saoves ouch kiër op kiër poëpgeil nèeve ein in bed lage. En jeh, den wètse het waal hē...” Mer oppendoor hōbse het ter waal mèt g’hadj. Dao waas ei koppel, ich gaon gein name numme, diej wouwe mich gèer mèt inne verloskamer. Ich môg de navelstreng doorknippe, ômdet ich zoëgezag ein vaste handj hōb! Mer ôm dao noë ei paar oore lank



Jean de Kinjervriendj, olie op dook, 2019

op staon te kiëke, esse geen familie bès... Toch ei bitje ôngemèekelik. In ‘t begin neet, mer es het einmaol bezig is... Toen dach ik toch: waas ich noë mer gewuuën inne kantien vanne Raom!”

Dean de Winter en Ine Tholen zeen rechtoët: “Ôs **Line** hōbbe wèe verwèktj inne naosleip van

het OLS, det kloptj. Dao is effe wirk aan gewèest, want Dean ze zaod waas fel verzwaaktj van al det beer mèt diej daag. Het veuldje ei bitje wiej het kavele. Det kintj dèk lank dore, dao weurdj veul en snel gesjote, mer oëteindelik wintj de volhaojer.”

Biej **Kris Peeters en Tiffany Bruckers** huuëre wèe dezelfdje geluide. “Ôs **Noua** is ei echt OLS-beebieke. ‘t Is zelfs zoë erg det wèe eederskiër es wèe ein van heur pemperkes môtte verveese,

het presies ruuëktj wiej platgetroje graas en versjraoldj beer op ein fiësttentvloer. Wèe hope zelfs det ôzze kleine later eine sjôt weurdj. Den is de sirkel pas echt rōndj!”

Es lèste stake wèe ôs leecht op bije **Koen Quix en Daphne Curzydlo**. Quix dreijt alles behalve suptiel rōndj de pot. “Boëswildj van det prachtig OLS ginge wèe bekans eederen daag d’r aan wiej verkes Wullem. Het begôs mèt sjerp te sjete, mèt blinkendje kōgel en ein prachtige luip. Op het lèst begôs het te liëke op het kavele, eine echte oëtputtingsslaag, mèt det versjil detter bjôs gei volk op ôs vinger sting te kiëke.

Oëteindelik is het ôs gelōktj de vogel aaf te sjete. En det is dus ôs leef klein **Maxine** gewore!”

Wèe vanne Rabbedabber vinje het allemaol fantastis! Miër kinjer is miër plezeer! Miër klein karnavalistjes ouch. Laot uch dus ouch dit jaor mer allemaol flink gaon!

VÈTTIGE MÔPPE



Ronald Zuidam en Wendy Kin, en Bart Kunnen en Gaëlle woëne tegeneuver ein. De twië manskèerels staon bij Zuidam aane poort get te kalle. "Jông," vreugtj Bart. "Zeetj gèe echt zoë gierig es Hollènjer?"

Ronals: "Mer nèe, wèe zeen gewuuën zuinig. Beveurbeeldj: ich koch mich gister bij **Jan-Arie de Jong** eine noëwe verrekiëker. Ich haaj de keus tösse eine van 100 en eine van 20 euro. Ich pakdje dèe van 20 euro en toch hōb ich dao good mèt gezeen wiej des dich diej van dich aan 't pakke woors oppe keuketaofel!"

Bart: "De haajs toch bèeter dèe van 100 euro gepaktj. Den haajse gezeen det het diën vrouwmes waas!"

Christof Vanvlijmen is piloot op eine vleejer, boë ouch **Vera Hendriks** op zijt es stjuwardes. Christof puktj de mikro en hètj eederein welkōm. Goojendaag bèste passagiers, bliej det gèe vleejt mèt ôs vandaag. Wèe gaon nao Madrid, en de vlucht doortj ôngeviër 2 eurkes. Geneet ter van en tot strak!" Nao den oëtlèg vergètj 'r de mikro trōk aaf te zette. "Deh, d'n ottomatische piloot op, den iëst efkes miën boterhamme opèete en den gaon ich diej blonj stjuwardes ins langs achter pakke." Vera, diej zjust aan het opdeene is, huuërtj det en begintj mèt roëd aangeloupe kake door het gankpaad te loupe, boë ze opins euver en sjakosj van **Gerda Knoups** struuëkeldj. Gerda zeet: "Wècht de mōs dich neet zoë spooje, hèe geit iëst ziën boterhemkes nog opèete!"

Eddy Willen waas krank. Hèe geit nao **dokter Bullen**, dèe hum ôngerzeuktj. "Gank hiej langs mer ins in ei pōtje pisse," zeet Fons tege Eddy. Eddy duit waat d'n dokter hum zeet en geuftj het pōtje aan hum. "Waat is mich det?!" zeet Bullen, "det is sjampanj waas dich pistis! Preuf mer ins!" Eddy siptj ins van het pōtje en jao: geine twiëfel meugelik. Det is sjampanj! Eddy kumptj bjun en zeet hiël door het gek hèer tege **Wendy**: "De geluifs mich noëjts, mer ich kōm bij d'n dokter en dèe zeet mich det ich sjampanj pis!" "Ah," zeet Wendy al lachendj, "sjōd mich den mer ins ei glèske in." Eddy: "Nèenèe, dich moogs vanne fles drinke!"

Môppe

... God versjeen veur Adam en zag: "Adam, loëster. Ich hōb beslote ein gezellin veur dich te make. Zoë es ich de liëuw de liëuw, de stier de kōw, de kater de poës en de reu de teef hōb gegèeve, gaon ich de man het vrouwmins gèeve."

Adam: "Det liëktj mich ei good gedach! Zoë bèn ich neet allein en inne winter kinne wèe knus tegenein ligge zoëdet wèe gein kaoj kriëge."

God: "Het vrouwmins zal op dich liëke, mer ze zal sjoëner zeen. Zoë sjoën desse al gelōkkig zuls wèere esse ter nao kiëks. En ich zal heur ei lieftallig karakter gèeve. Ze zal leefhōbbendj, gedōldig en begripvol zeen, altiëd aan dich dinke en dich d'n hiële tiëd gelōkkig wille make. Ze zal noëjts wèers zeen, ze zal dich altiëd geliëk gèeve, ze zal altiëd bij dich bliëve en good nao dich loëstere."

Adam: "Det klinktj fantastis! Mer euh, waat kostj mich det?"

God: "Eine erm en ei bein." Hiej dach Adam ins deep euver nao. En toen vroog hèe: "Waat kin ich kriëge veur ein rib?"

... Waat hōbbe vèrf vanne Action, verzekeringe van Cofidis en **Tom Vanlee** gemein? Ze dèkke alledriej neet!



Matsj G-tiëm MNO Rabbedabbers weer verkoch!

De winner teejks it aol!
Eederein kintj ze waal: det groepke oët Zwede det het ei sukses nao het anger gekindj heet. Wëem ze neet kintj: vraag het mer ins nao bij **Marijke Voets van Tony Vanwijck**.



Wëe, Rabbedabbers, kinne ouch zoë ei groepke det de suksesse aanein rijgtj. Het G-tiëm van Maaslandj NO. Driëj kiër goud oppe Spesjal Olimpiks, ôntèlbare euverwinninge inne kômpetiesiej, ... Diej men en vroluuj höbbe al zoëveul suksesse belèefdj det 't veur heur bekans vanzelfsprèekendj is det ze al winne of kriëge. En zjus dao vringtj het voetbalsjeunke. Wëe es Rabbedabbers zeen ter van euvvertuuëgdj det neet altiëd alles èeve ièrlük verlöptj. Wiej verklaorse angers hun euverwinninge tege ôs topploog de lèste jaore?

Dit jaor zouw het angers zeen, dit jaor zouw de euverwinning veur ôs zeen! De olimpisse gedachte woor begrave en mèt ein good gevöldje envelop richting de sjeids! Bliëktj opins det diej twië anger trèeners dèezelfdje sjeidsrechter al vieja eine struuëman benaoderdj haaje! Det numme ze den van twië wallekes èete, in dit geval van twië envelope! Mer det waas oëteindelik nog neet het ergste!

Al ônger de veurbereiding woor het weer snel klaor en duudelik det 'r neet mèt geliëke waopes gestreeje woor. De tegels van ôs kleidkamer wore hawf opgebroke, boëdoor ôzze spits **Ronald Zuidam** ônmiddelük door ziëne inkel op ging. De poët opins zoë dik es ziën pens! Diej hoeliegans kreges het zelfs klaor det ôs sjefaasj oët sting, en det ôzze bak beer bevrore waas. Riejere vanne kaorj dus, al vanaaf det wëe ôs voetbalkleijer aan môste doen.

Ôndanks al diej tegewirking kinne wëe waal zëgge det wëe de matsj volledig nao ôs handj koste zètte. Het stông al rap 2-0 veur ôs en aane röst stônge De Rabbedabbers 5-3 veur. Nao de röst (weer bevrore beer, weer lekker werm inne

kleidkamer van het G-tiëm en weer iëskaod bjôs) bleek snel det ôs envelop minder gevöldj waas es diej van het G-tiëm. Ei paar duubiejeus beslissinge en get flauwe kwatsj van dèe sjeids later stông het geliëk: 5-5. Ôzze Vorst waas toen al nao binne, dèe haaj ein kaorj oppe blaos gekrege. Gei probleem! Nog 8 menuuëte te speule en wëe zouwe waal rap diej winnendje gool make en ein verdeendje euverwinning mèt heivis pakke. En waat gebeurtj 'r, dinkjtj gèe? Eine vrieje trap tege: 5-6. En toen float dèe innet zwart aaf! Nog 6 menuuëte te speule en dèe paljas flötj aaf mèt d'n oëtlèg: "Miën horloozje teltj!"

Dao stuise den. Alles gegèeve en ein teleurstelling riëker. Wiej zagse det alweer? De winner teejks it aol! Jaojao, det zal waal!



Kinderse fitser wiltj neet wiëke!



langs de groëte baan wèere eksklusief veurbhaoje veur de luj mèt eine spiëd pedelik. De söggelfitsers wiëke oët nao eine strook oppe baan, en kinne dao hunne wëttelikke mèeter plaats op eise. Ei bitje wiej ein fitsstraot, mer den langer en groëter. Ich höb dao al planne veur oëtgetèkendj en diej opgesteurdj nao Brögge en Wèeg en nao **Lydia Piëters**, de menister van verkiër. Ich dink det het waal good geit kòme!”

“Ich wiëk neet mië!” aldus eine striëdvèerdige **Dirk Beijnsberger**. Dirk is al jaore zoëget de bekindjste snelfitser oët Kinder. “De bèste oëtvinjing oëjts, sins de òntdèkking vanne kajak!” zeet hëe aan òs redaksiej, es wèe bjum op bezeuk zeen. “Het is good det diej koeraörs indertiëd betraptj zeen mèt heur meteorke inne kader. Sins dëe daag is ter eine angere wèereldj veur mich oop gegaon. Ich doon praktis al miën verplaatsinge mèt miëne spiëd pedèllik en dao höb ich nog gei momentj spiët vag g’hadj. Ich hool gemekkelik snelhede tot 60 killemèeter per oor, mer òndanks miëne volledig fluuwo outfit vinj ich het lèevesgevaorlik oppe baan en oppet fitspaad. Ich eis verangering, alles waat verkiër betrefjtj môt mer ins oppernôw wèere bekeke!”

Rabbedabber: Verangering? Wiej zuuëse det presies?

Dirk: “Ich höb ter genôg van, van diej kammejaos diej neet wille wiëke. Ich höb recht op eine mèeter veur mich allein, mer dao

bèn ich neet mèt akkoord! Ich eis minstes de hëlftj vanne baan! En ze môtte neet gaon lemmetere en disketere: ich höb altiëd en everal miëne rolmèeter bie. En eigelik, nao det fitsepaad maag ter ouch ins krietis wèere gekeke. Det getaffel en gesjörg van diej söggelèers, dao kriëg ich het van. Mèt twië nèeve ein tege twelf per oor, en neet langs op te kòme. Wiëke môtte ze! Mer ich höb dao nao ein eurke prakkezere ein gooj oplossing veur gevônje!”

Rabbedabber: De maakt òs noësjierig. Vertèl!

Dirk: “Simpel! De gooj fitsepaade

Rabbedabber: Good plan!

Missjien is ter nog get boë desse òs mèt kins helpe. Vreuger leep de fômfaar veur òs stoet op, òm de baan vriej te make, mer dao zeen ze ei paar jaor geleeje mèt gestoptj weges ei perseniëlstekort. Es dich noë ins mèt fits en rolmèeter veur òs op trèks, den zeen wèe ter zeker van det eederein zal wiëke veur de stoet.

Dirk: “Det zal ich waal regele! Ich garandeer uch eine doorgank van 4 mèeter! Ich zal mich waal ein lang lat achter de vélo hange.”

Rabbedabber: Toppie! Wèe bedanke dich noë al!





Ein Vespa klup in Kinder!

Koen Quix, Jan Brouns, Tom Brouns, Erik Janssen, Brecht Vanhoef, John Bombeke, Luc Willems en Peter Hoedemakers höbbe ein Vespa Klup opgericht! De Kinderse baajker bojs zèg mer. Erik Janssen is de zelfverklaordje veurzitter van Costa Mosa. Wèe ging ins langs veur ein intervjoew.

Rabbedabber: Daag Erik. Fijn det wèe ins mochte langs kòme. Sjikke tuf höbse! De straols ter hiëlemaol van esse dao op zits. Lèg ins oët!
Erik: “Veur mich is det, jeh, de ideale tuf. Zoë simpel is det. Eederein heet zië merk. Ich höb respekt veur eederein zië merk, mer bije mich is det Vespa en det is veur het lèeve. Zoë simpel is det. Det is miën dink. Punt. Det puktj neemes mich aaf. Miëne Vespa, det is miën heiligdom. Ich bèn mèt eine Kamieno ins oëjts nao zië gewèest. Ich waas geradbraaktj, ich wis neet waat mich euverkwaam. Zoë simpel is det. Veur eine Vespa maag het hagele, sniëje, rèegene, num mer op. De geis gewuuën, en de geneets ter van. Eedere mèeter dèese riëjs geneetse. Noë is de meteure kaod, mer es dèe werm is, is det geluid prachtig. En esse in eine tunnel riëjs ofzoë, den is det echt knap. Pak mich miëne Vespa aaf en de moogs mich nao het kirkhoof bringe. Zoë simpel is det! Det klinktj misshien onuuëzel veur sòmmege, mer det is den heur

problem. Ich bèn eine Vespaman en zoë zal ich sterve. Zoë simpel is det. Punt.”

Rabbedabber: Det is nogal ein adoorasiej. En anger merke, det vinse niks?

Erik: “Tege eine Vespa kintj niks op. Dèe plasticke kraom bije diej anger merke, det is rômmel! Of de kals de kal, of de zwiegs! Det dink ich ter van!”

Rabbedabber: En in uch klup zitte allemaol van diej fel manskèerels?

Erik: “Ich bèn wiëd eweg de felste. Daoveur bèn ich ouch veurzitter. Veur al de rest is het veural òm weer ins vanne koëj weg te zeen. Veur mich eine lèevesstijl. John Bombeke duit veural mèt òm te kinne oëtpakke. Hèe môt altiëd het deurste van het deurste höbbe, en is det nao ei paar wèeke weer kaök. Jantje Brouns duit mèt veur de kik. Es dèe op kop riejdj, löptj dich nao 10 killemeeter het zweet al door de vot. Jan geit veul te hël! Hèe sjoortj bekans mèt de knieje euver de gròndj inne bochte. En den höbse nog Brecht Vanhoef, dèe feejker. Dèe geit allein mer mèt es het veur te vrèete is...”

Rabbedabber: En höbtj gèe mèt uch klup nog planne veur de kòmendje tiëd?

Erik: “Volgendje zomer gaon wèe op Vespakamp in Italië. Ich bèn al op

miën eige op verkènning gewèest en höb ein sjikke roete oëtgestippeldj en al get B&B’s vastgelag. Det geit allemaol get koste, dus wèe höbbe mèt de klup eine kalender oëtgebrach. Al òs vroluuj pozeere dao-op mèt eine Vespa. Janewariej is Kim van Pé Hoedemakers, fibrewariej is Veronique van Tom van Brouns, enzoëvoort. Eine must hef es ich het zelf maag zègge. Te koup veur 25 euro ’t stök bije de lede vanne klup.”

Wèe vanne Rabbedabber winse dees Kinderse baajker bojs alvas veul plezeer op heur toertocht volgendje zomer. De kalender hingtj bije òs redaksiej al te blinke op het huuëske en het maag gezag wèere: fraaj modelle!






Flitse van oppe



Prinsezitting!





Groëte strijd ôm Kinderse keesbuim!

Het is uch zeker opgevalle, de aafgeloupe fiëstdaag. Dao sting eine spisjale keesboum op 't Dörp. Sjoën dink, zulle de meiste waal höbbe gedach, mer wèe vanne Rabbedabber weite oët gooje brôn det 'vrede op aarde' aafgeloupe Keesmis wiëd te zeuke waas. In het gemeindjehoës heet het ferm gestuuëfdj, zoë ging de kal rôndj! Wèe ginge mèt ôs redaksiej op bezeug biej börgervaajer **Jo Brouns**, ôm hum ins flink aane tandj te veule.

“Ein sjanj waas het,” zoë ging Jo al drek tekiër. “Waat waas mich det ei zjevaakel. Ich veuldje mich inne zeik gezatte. Ich môt missjien iërlik bekinne: sins ich eederen daag op en aaf tuf nao Brussel, en dao eine rejaal groëttere buro höb es dèe waat aane Breejerwèeg stuit, höb ich ze neet mië fatsoenlik inne handj. Dèe **Wim van Bökke** is nog d'n ergste. Ich höb missjien 11 kiër gezag: geine naomaak, ich wil en zal eine echte kriëge. Neet

wille loëstere, dèe wèersnak oët Kèsing!”

Rabbedabber: How, börgemeister. Waat zèktj gèe ôs noë???

Jo: “Ich versliktje mich in miëne bookeskook toen ich de meejl zaag binne kôme: ‘Bol.com danktj uch veur ugge aankoup.’ Haaj ter mich toch geine kale paol mèt ei nè lempkes bestèldj, det kuëke! Neet allein zaag ich de kômmentaar van UNIZO alweer kôme, det wèe neet



‘hiej haaje gewinkeldj’, mer het ergste vônj ich nog det op eine slaag hiël miën beeldj van waat ich vinj det eine keesboum môt zeen zaag

smeltje es snië veur de zôn. Weg sfeer! Eine keesboum môt greun zeen, naoldje höbbe en leefst nog groët zeen. Ich höb alzelëve gèer de groëtste g'hadj, môtj gèe weite. En oppe koup toëw wis ich det diej vanne kirkfebrik weer ginge lache in heur vuuësje.”

Rabbedabber: Ah, noë snappe wèe het boërôm pestoër Luc en Thieu de kôster dao höbbe ligge protestere aan hunne keesstal.

Jo: “Valla, gèe zeetj mèt! Det is eine ôngerlinge strijd dèe al efkes aane gank is. En waat eine flauwe: inkel en allein mer ômdet ich het vrèk eine keesstal op het Dörp te zètte. Mer ich höb dao miën reejene veur. Sjeijing van kirk en staot, ich pak det nogal letterlik, zeetj gèe...”

Rabbedabber: Duidelik verhaol. Mer good, gèe gaotj het hiej biej laote, of...?

Jo: “Bèsse gek! Det genaöl van Wim det ze geine sjoëne groëte denneboum mië koste vinje, en det het neet mië kintj ôm buim te kappe allein mer ôm ze veur angerhalve maondj te gebruuëke en den weg te doon, det môt ich neet weite. Ich höb drek aksiej ôngernome! Ich haaj mich toch pas botte gekoch ôm veur de pers te gaon pozere in d'n toter toen ze det klimaatbos höbbe geplântj. Ich mich diej botte veur d'n twiëde kiër aan, biej **Dominiek vanne Bôndj** eine sjoëne spar gekoch, en aan hum! Ich höb mich zelf eine keesboum inne grôndj gestoke op dèe veur de rest vriej nutteloze sirkel op 't Dörp. Laot det dink mer grujje! Eeder jaor lempkes d'r in en juu: Keesmis wiej het zich huuërtj.”

Rabbedabber: En waat mèt dèe paol mèt diej ledlempkes?

Jo: “Dèe moogtj gèe uch kôme oplaaje!”

Rabbedabber: Amen.



Wildjgruj reklaam op 't Dörp binnekort eindelijk ônger kôntrol!

Het is uch vas al ins opgevalle detter aaf en toew waal hiël erg veul reklaam weurdj gemaaktj op 't Dörp. De plakkate vanne Rabbedabbers: diej zeen neet te groët en zeen erg sjoën, mer dao stuit ôs dèk toch get rômmel biejein. Het kintj neet op! Oët betrôwbare brôn weite wèe det de gemeindj aksiej geit ôngernumme ôm de wildjgruj ein haltj toew te rope. Dao is zelfs al ein test gewèest mèt ei digitaal ledbord, mer det veel get te klein oët. Dao is ein anger en groëter bestèldj, en det zal ter ei paar wèeke nao de vastelaovendj waal staon.

D'n dröppel dèe d'n ummer deej euverloupe, waas de reklaam veur het zoëveulste festivalleke van **Toon Smeets**, bie vaajer **Twan** inne hoof. Toon haaj bliëkbaar gei budzjet miër, want opins waas het ruzie oppe Kaltissestraot. Bliëkbaar haaj **Anita** aan Twan gevraodj boë heur good hoeslake waas. Toen Twan antwoordje det Toon dao inne sjop mèt vèrf op haaj ligge sjrieve en daonao ter mèt nao het Dörp waas getrokke, waas het hèk vanne dam. Neet allein good liëvendj nao de

vaantjes, mer ouch ei regelrecht sjandaal op 't Dörp. En toen waas het good gewèest.

Het gemeindjebesteur besloot ein test oët te veure mèt ei hiepermodern, digitaal ledsjerm. Veur alle noëts euver fiëste, èetdaag en waat nog allemaol. Dao waas mer ein klacht, van **Jaak Jacobs**: "Det dink waas veul te groët, veul te fel en het stông verkiërdj geplaatstj! Ôzze hiële gevel waas verleechtj en veural bie **Natalie** en mich sjeen det fel ledleecht binne.

Mèt diej poste waat ich dreij is het al neet gemèekelik, mer mèt det kunstleecht tege de plefông vanne slaopkamer ging mië biejeritme hiëlemaol nao de vaantjes. Ich hób bezwaor ingedeendj!"

Wèe hóbbe ôs leecht ins opgestoke oppe gemeindj, en dao wiste ze te zègge det ze mèt Jaak ziën klacht rëkening ginge haoje. Dao kumtj ei veul bèeter bord aan, en eederein geit meinis kôntent zeen! Wèe vanne Rabbedabber zulle ôzze reklaam alvas door meeje!



In dees splintjernôw rubriek kintj gèe uch vraoge, klachte, ideeje, roddels, bedinkinge en waat nog allemaol kwiët aane Rabbedabber. Wèe sensurere niks, en gèeve gratis en veur niks ôzze gooje raad aan uch weg. Fijn detter al drek hiël get wuillesse inne pen of innet toetsebord krope!

LÈEZERSBREEVE, SMSKES, EPKES OF MEEJLKES AANE RABBEDABBER!



Drama inne hinnekoëj

Leefste Rabbedabber, Wèe höbbe bekans gein anger keus es ôs tot uch te richte. Gèe kintj hum en gèe höbtj 'r missjien nog ei bitje invloed op. Bjôs heet het drama zich voltrokke, en wèe weite ouch van anger luj det het hiël snel nao de kloëte kintj gaon esse efkes neet oplèts. Het zitj zoë. Raf Nijs heet nao de Pinksterkoers bij VDS vollebak pinte zitte drinke. Hèe waas zoë zaat detter bjôs bij de hoonder heet môtte euvergèeve. Sangerdaags wore al ôs hinne kepot! De puuëj ômhoëg! Ich höb sjrik det det aan dèe Jupiler laag...
Tom Prenen.

Geine sjrik, Prenen. Röstig blieve. INBEV is ei kwaliteitsmerk wiej gein anger. Kans is groët det diej frikedelle van 's middes en

dèe pita van 's nachs ter veur get tösse zitte. De koëj is ôngertösse toch ôntsmètj mèt Detol, moge wèe hope...

Klimaatplan

Daag Rabbedabber, Weurdj het neet ins hoëg tiëd ôm ei fatsoenlik klimaatplan te sjrieve veur Kinder? Angers gaon wèe diej doelstèllinge veur 2050 noëjts hole! Wèe zeen al good begos mèt de redding van diej 2 buim oppe speelplaats vanne sjoël, mer allein daomèt gaon wèe ter neet kôme. Ich höb nog get klein veurstèlle. Iëst en veural môt de boorderiej van Linseboor toëw. Al dèe zeiver en groëtspraak waat dao de locht weurdj ingesteurdj, det is veul erger es CO2! Verder dink ich det het ouch good is, ôm Biësel aaf te gèeve aan Bree. Det sjildj ouch ei pak oëtstoët waat ze teminste neet aan Kinder kinne toëwsjrieve. Alle bitjes helpe!

Groetjes, Ilse Jacobs

Sterk bezig, Ilse. Dach eederein mer ei bitje mèt, gliëk des dich duis.

4 keuninge

Ha Rabbedabber, Gèe mèt uch stömmingmakeriej veurig jaor in uch gezèt! Het heet ôs neet klein gekrege! Lekker puh! Wèe zeen de keuninge en wèe zulle uch prinse waal klein kriëge! Wèe bringe oppendoor ei leger van sinjore oppe bein, en den pakke wèe de karnaval euver. Ben vanne Kaap is dit jaor al euvergeloupe, en dao zulle ter nog volge! Haodj uch mer vas aan de tèk vanne buim. Tege volgendj jaor zeen wèe ter zeker van det wèe Pool Frit ouch zoë wiëd kriëge zich bjôs aan te sloëte!

De veer keuninge.



Wèe môtte de strijdbijl mer ins begrave. Pool Frit bliëftj bjôs, en in ruil organiezere wèe ein sinjorezitting. Waat dinktj gèe dao van?

Spem

Bèste Rabbedabber,
Eeder jaor tösse november en
janewariej wèer ich raadgek
van dèe Danny Kunnen. Dèe
bliëftj mer zèege òm nao ziëne
èetdaag te kòme, dèe bliëftj mer
insjrievingskaarte steure. Vieja
meejl, vieja Feejsbook én inne
breevebös. Det is spem! Waat dinktj
gèe det ich dao aan kin doon?
Bart Janssen.

**Bliëve negeere, Bart. Det doon
wèe ouch allemaol...**

Nao de moaon

Hoëggeachdje Rabbedabber,
Ich laas lèst innèt Belangskè det de
Amerikane es iëste landj oëjts, binne
de 5 jaor ei vrouwmès oppe maon
wiltj zètte. Ich dag drek: det ze òs
Sara den mer pakke! Waat dinktj
gèe dao van: is det ei good gedach,
of is det ei good gedach? LOL!
Groete, Dave Bullen.

**Stèl dich mer neet aan, Dave.
Waat zouwse zònger Sara zeen?
Hiëlemaol niks! Hang mer
neet de ruige oët en veug dich.**

Vergèetechtig

Hoëggeachdje Rabbedabber,
Mea Kulpa. Ich bèn al ei paar kiër
het blaad vanne euverledene veur
de jaormèsse rats vergèete. Ich
bèn mer ins bijeichzelf te raoje
gegaon inne beechtstool. Det is
waal neet gemekkelik, want ich
mòs op 2 plaatse tegeliëk zeen en
det waas ei gedoons. Het heet mich
waal good gedaon, want opins zaag
ich het leecht. Det vergèetechtige
liktj aane mèswiën. De opwòrming
vanne aarde zòrgtj veur ein droëf
diej veul heller gistj. Dus straffere

wiën en veul miër alkool in het
blood. Ich beloof hiej plechtig op
miën kemmuniejzielke det ich
veur ein jaormès neet miër aane
mèswiën gaon. Goëj estebleef geine
stein nao mich. Want wèem zònger
zunj is, maag de iëste goëje.
Kristelikke groete, pestoër Luc.



**Het is uch vergèeve, meniër
pestoër. Misse is minselik!**

Stoke mèt Sint Martinus

Bèste Rabbedabber,
Ich erger mich kepot aan det
gestook mèt Sint Martinus. De
rouk, diej asse, det is toch neet
miër van deze tiëd! Mòtte wèe
neet aan òs klimaat dinke en det
allemaol verbeeje? Kinne wèe dèe
houp neet vervange door ei groët
sjerm boë-op eine dvd van eine
brannendje ope haard weurdj
aafgespeuldj? De kins det sjerm
ouch drek inne tent zètte in plaats
van boëte, en den treije ze ouch
neet al die wòrm in det veldj kepot.
Groetjes, Patrick Golkowski.

**Sjaam dich, òngezellige
desse bès. Dich hòbs de
veurige jaore zeker ouch inne
divan bjuch nao de stoet
gekeke oppe laajf striëm van
Grenslandj Aktuweel!**

Lees verder pagina 30.

Wist gèe det...

... ouch **Marc Meurs** te
kinne heet gegèeve nao dit
huidig seizoen de griëze jas
aane wilge te hange. Volges
hum ein meujlikke keus, mer
ein iërlikke. Gelökkig wiltj
'Media Marc' nog hiej en
doe òs vereining helpe boë
det nuuëdig is, en dao zeen
wèe hiël blij mèt!

... in september **Radio
Monza** heur 40-jaorig
bestaon geit veere! En det
wèe òzze bèste reporter dao
gaon hèer steure!

... de KBC in Kinder is
opgebloaze en heet dao nog
winst op gemaaktj. Ein van
diej euvvallers haaj z'n
portefuij laote ligge.

... wèe de luj wille bedanke
diej mèt hòbbe geholpe aane
totstandjkòming van dees
gezèt. Bedanktj, bedanktj en
nog ins bedanktj!

... det wèe innèt bezunjer
**Marc Meurs en Francien
van Fotocieniek** bedanke
veur heur groëte hulp bije
het make vanne foto's.

... **Jacky Kit en Margot**
aafgeloupe jaor nao Spanje
zeen gewèest. Margot
heet niks g'hadj van heur
vakansie, want Jack is daag
aan ei stök krank gewèest.
"Dao kwaam allein nog mer
broëne kit oët," vertèldje ze
tillèfonis aan òs redaksiej.

De Kinderse Kaanon!

In naovolging vanne Vlaomse regering geit ouch in Kinder eine Kinderse Kaanon wèere same gestèldj. Det is ein lièst van zake diej ôs Kinderse gesjiedenis tiepere, dinger diej in het kollektief geheuge môtte zitte. De jung gaon det in ôs Kinderse sjoële môtte lière, en minse die van boëte Kinder kôme en hiej gèer wille kôme woëne, môtte dao eine kursus euver volge, met verplichtj ekzame! Angers trök nao boë ze van kôme!

Ieniesjatiefnummer **Niels Van Eygen**, geuftj ei weurdje oëtlèg: "Ich höb het 'r gelökkig door gekrege. Zoë eine kaanon is lèevesbelangriëk. Veur ôs naogelacht, veur de Kinderse iedentiteit te ôngerstrepe. Veur ôs fierheid! Ich höb eine groep



Kinderse wiëze biejein gebrach en wèe höbbe ei paar daag vergadertj. Dao is aardig gesteggeltj gewore, mer ich dink det 'r eine stevige basis ligtj ôngertösse. In het penel zoot **Pool Frit en Tei Vandael**, toch neet de minste. Veur het evenwichtj enne gendergeliëkheid höb ich ter ouch 2 vroluuj bie gestoke: **Mia van Quix en Anja vanne Legerstok**. Ich waas veurzitter vanne vergadering, en det ging mich good aaf, al zèg


ich het zelf. Ich höb ei veurbeeldj gepaktj aan Jan Peumans: eine werme mins, get sjèele zeiver aaf en toë en streng es het môt."

"Wèe höbbe ôs ei lank wiekendj trök getrokke inne biejbôw vanne verkesstal van **Steeff vanne Basdônk**. Ich haaj leever in ein sjalèt inne Ardenne gezèete, mer dat waas get priezig. Diej Wale dörve nogal get te vraoge! Ich môt zègge det Pool enorm oppe debatte heet gewoge. Dao zitj hiël veul euver èete in ôzze kaanon, mer den wètj gèe boëvan det kumtj. Ôm het neet te meujlik te make, zeen wèe begôs mèt de kaanon van nao de fusiej in 1971."

"Ich vinj het super det wèe ein veurpubliekasie van ôs wirk van blood, zweit en traone ièst inne Rabbedabber moge publiesere. Leever det es inne Kinder Info vanne gemeindj. Den geit mich Jo weer mèt de ploëme loupe." Wèe vanne Rabbedabber vinje het sijk det wèe ein ekskluzieve veurpubliekasie van de Kinderse Kaanon moge plaatse in ôs gezèt. Wèe môste van Niels nog

Kinder Mèt Make!

Kinder Mèt Make. Het waas d'n oproop vanne gemeindj ôm mèt nao te dinke euver waat 'r allemaol zouw môtte of moge gebeure in ôs dörp. Ouch bie ôs Kinderse karnavaliste viltj 'r het ein en anger mèt te make...





mètgeve det es gèe zelf nog ideeje of veurstèlle höbtj, gèe hum eine meejl moogtj steure.

De Kinderse Kaanon van aod Kinder, sins 1971

- Bickieburgers van Pool frit
- Piër Grispe ziene gèele rèegejas
- de punès
- òs gemeindjehoès det in het midde van nörges is gezat
- Biësel, in feite òs eige Bôkriëk
- De Rappetappers: ein karnavalsvereniging mèt miër karnavalswages es lede
- Kinderse stoofkarbonade, ouch van Pool frit
- bookeskook van Jos Vandewal
- Kniën op groëtmoojers wiës, mer den wiej Pool frit het muktj
- Karnavalsgezèt De Rabbedabber oët het jaor 2002, toen perôngelök in het blauw gedröktj
- Payke de faktaör
- Mètdrinkzaak De Hagendoren
- De aoj parochiezaal
- Diej massa kèeskes diej de Landelikke Gilde altiëd weer gebrooëktj esse ei groët fiëst haoje
- de plôfkrakeplaog
- vollebak zingentèere mèt meister Chris

VÈTTIGE MÔPPE



Emma Smeets heet sins kort ein biejerdeenste beij de Fra Mauro in Mezeik. Ze zitj op eine zôndigmiddig eine kola zero te drinke beij kaffee Sport. **Jack Christis** geit langs heur zitte. “Aangenaam kinnis te make,” zeet Jack. “Waat duise veur de kost, mèegdje?”

Emma antwoordj hum, terwiël ze hum recht in het gezicht aankiëktj: “Ich neij alles en eederein, boë desse mer wils, beij mich aan hoës, beij dich, hiej achter het buffèt, het muktj mich allemaol niks oët. Det doon ich al lang, ich vinj het heerlik en ich doon het gèer!”

Jack: “Det treftj. Ich bèn ouch advekaot!”

Lei vanne Pepel zitj op het terras beij het Rôndj Punt. **Demi Zoike** zitj dao ouch mèt heur kammeraøj. Ze heet pas heur haor laote doon. Eine hanekamp in versjillendje kleure: greun, oranje, roëd en blauw! Lei vindj det allemaol mer spisjaal en hëe kintj neet stoppe mèt Demi aan te stare. Demi vônj det alles behalve en op eine kiër waas ze het meug. “Zèg aoje,” vroeg Demi sarkastis. “Waat is het probleem? Höbs dich nog noeÿts get wilds gedaon in diën lèeve?” “Och mèegdje,” antwoordj Lei, “ich höb 20 jaor geleeye ins drugs gepaktj en toen eine pauw gepôptj, en ich vraag mich al ein half oor aaf of des dich dao het rizultaat van bès!”



De skaaj is de limit in Kinder!



En hopla: dao is **Roel Bosmans** weer! De Kinderse òngernemer mèt ver-e-weg de meiste versjieninge inne Rabbedabber sins het lèste deesennium. Dè sjarel is ter ouch dít jaor weer in geslaagdij òm mèt ziè vrouwke **Katrien** in òs gezèt te gerake. De kins ter den ouch neet langs kièke: hèe bliëftj bezig en hèe bliëftj aan 't raoze. Wèe dinke det òngertösse het maksiemum bereiktj is, want waat Roel noë weer allemaol heet aangevange en nog geit oëtvrèete: de skaaj is wirkelik de limit!

Gèe höbtj het waarsjienlik al gezeen, es gèe Nelisveldj op vaartj of es gèe ins zeetj gaon winkele bie KARO: Roel en Katrien höbbe eine ferme biejoëw gezatte. Stokaasj zoudj gèe dinke, mer niks is minder waor! Ein en al oëtbreijing vanne al bestaondje zaak, mer dits kiër neet òm nog miër kleijer en akseswaares bie te pröppe. Ze zeen bezig aan de kleijerwinkel vanne toekòmst! Wèe laote Roel bèst zelf efkes aan het woord.

Roel: "Eine kleijerwinkel vanne toekòmst, gèe zègtj het good! Totaalbelèving veur de hiël familie! Es de vroluuj klèdjies, ròskes, bloeskes, topkes, bòkse, òngerliefkes, zòk, kèttinge, ermbendjes, oërbelle, sjakosje, sjoon, of al diej anger zake waat wèe in òs euverkompliëte zaak allemaol höbbe, aan 't passe en probere zeen: waat mósse den mèt diene mins en de kinjer aanvange? Dao höbbe wèe strak ein iedejaal



oplossing veur: de KARO-SEL en het KARO-BUFFÈT! Es de jung zich amezere in òs binnespeultuin, mèt vol-ottomattisse karousel, kintj vaajer zich ei pötje drinke aan d'n toog. Ouch alles aan sjappelikke priëze, of waat haatj gèe gedach?!"

Rabbedabber: Ferm! Dao höbtj gèe weer good euver naogedach, det 'kwaliteitsmerke' wèe. (nvdr: Roel en Katrien appresjere de slüëkreklam, want ze lache zich de tenj bloët.) De kal is trouwes ouch oët detj gèe uch weer eine drijhook gròndj höbtj gekoch. Waat is dao van aan?

Katrien: "Det kloptj wiej ein bös. Wèe wille, es òngernemers mèt klasse, gèer òs dörp mèt inne vèrf zètte. Toen miëne Roel wis det ter 12 are gròndj te koup lage aane Wiertersteinwèeg, sjuin tegeneuver **Neijmasjiene Herman en Tiny Janssen** waas hèe neet miër te haoje. Ganse daag leep ter van smörges tot saoves te wauwelle euver 'de poort van Kinder', ein prachtige lokasiej, gesjiedenis sjrieve en weit ich allemaol waat. Nao get pinte mèt ziëne kameraod **Brecht Vanhoef** wis ter het!"

Roel: "Kloptj, leefste sjattebout van mich. Det zègse good. Ich bèn



al gans miën lèeve eine leefhòbber van Amerikaanse kultuur. Dao is alles groëter, dikker en sjikker es hiej bjôs. En waat kriegse es Bosmans en Co de Holliewoed toer op gaon? Zjust: Bossiewoed! Ich zaag het al zoë veur mich. Eigelik stuit waal det kapelke inne wèeg, want det puktj dich hiël het zicht e-weg. Mer gei probleem: ich hób mich bij **Inox Ceysens** sjikke, groëte lètters op paöl laote make. Diej stèeke hoëg genôg inne loch, zoëdet 't kapelke kintj blieve staon. Ich wil gein ruzie mèt de hawf parochie en de ganse kirkfèbrik!

Ich hób inne gang mer get sterre mèt de name vanne Prinse van dit jaor innet fitsepaad laote lègge. Dao waas nog get inox euver. Ich laot ein van dees ouch nog ins eine rotsblok importere oët Dinant en dao maag den **Chris Geris** oët Biësel get köpkès in beitele. Es dèe det mèt hout kintj, zal stein ouch waal lökke. Bij de Legerstok get anger beitels hole en juu!“

Rabbedabber: Det is sjik. Wiej reageerdje de naober?

Roel: “Allemaol laajendj antoezjast, behalve **Lei vanne Pepel**. Dèe

begôs get te lemeteere euver slaagsjeem en het zicht oët ziene hoof waat bezoedeldj zouw wèere, mer dao gaon ich mich niks van aantrèkke. Laot dèe mer get oët raoze en den zal het waat vanzelf aafkeule. Ich kin hum...”

Rabbedabber: Lèste vraögske nog. Wèe weite oët gooje brôn det gèe lèst mèt Wiel van Naessens zeetj gaon kalle. Nog planne diej wèe es primeur moge bekindj make?

Katrien: “Och jao, det is zjust. Det waas niks spisjaal. Gèe wètj waal det Zontrop weg geit oët ôzze kubus op ôzze drijhooke aane Goërterhuëskesstraat? Ich dach: Katrien, stop mèt dèe zeiver dao en laot dich dao ei zwumbad in stèeke. De rame zeen toch zoë good es geblindeerdj al, en det de luj miën veuj, inkels en ôngerbein zeen es ich langs det bad paradeer, stuërtj mich neet. Aaf en toëw môsse ouch ins aan d'n eige dinke, anders geise ter los ôngerdoor.”

Rabbedabber: Bedanktj veur dit intervjoeuw!

Katrien en Roel: “Gèer gedaon, det wètj gèe. En tot volgendj jaor!”



Wist gèe det...

... de barbekjoew vanne **Ertesjeters** in Kèsing bekans opnôw heet môtte doorgaon! Diej vanne Garde eisdje ein hertèlling naodet eine vanne Raod van Èllef ein fout haaj gemaaktj aane kassa...

... ze **Jan Linssen en Wout Hoeken** hōbbe gekast veur de volgendje fillem van F.C. De Kampioene. Es het euver get oëtmëlke geit, zeen det namelijk de zjuste luj oppe zjuste plaats!

... Zoëwaal ôs **Jeugzitting** es ôs **Groëte Prinsezitting** gewuuënweeg TOP wore! De jeugd en in het bezunjer ôzze Jeugdraod heet het bèste van zichzelf gegèeve oppe Jeugzitting. Saoves oppe Groëte Prinsezitting wore ter optreejes van de Raod van Èllef, de Aod Prinse, de Aod Prinsesse, de Dames vanne Raod, de Sjaaimakers, Ôs Mam en Ich, 2 Dikke Vriendinne, de All Stars, de Jeugdraod, Teije, Boëswildj, Spik en Span en de Shakin' DJ's. En het belangriekste: Kinder waas massaal aanwezig, en gèe woordj ei geweldig publiek! Bedanktj!

... het nummer **1009** oppe inkôm-, steun- en tombolakaarte veur de Prinsezitting de winnaar is van het **vleispakkèt van 100 euro**. Of es gèe gei vleis löstj, ein kroëkèr slaaj, moëre en roëd moos. De winnaar maag zich melde bij van ôs lede, of vieja de Feejsbookpagina vanne Rabbedabbers.

VERVOLG LÈEZERSBREEVE, SMSKES, EPKES OF MEEJLKES AANE RABBEDABBER!



Vocht oppe lōnge

Leefste Rabbedabber, Hōb ich mich toch veur de Keesmis ei mini trōmpetje van oët de Aldi ingeaojemdj! Det zaat in eine adventskalender. Veul last hōb ich ter neet mer dao drōptj zeiver oët det mōndjstök en noë zit ich mèt vocht oppe lōnge...
Groetjes, Bart Neel.

Vocht oppe lōnge? Dich neet aanstèlle Bart. Stoof oppe lōnge is veur erger. Trouwes, laot dich ins neet zoë snel get in 't verkiërdje kèelgaat sjeete!

Vermistj

Leef luj vanne Rabbedabber, Heet eemes miëne Jo örges gezeen? Internèt liktj hiël al 3 daag plat en ich weit neet boë ter oët hingtj. Het lèste waat ich ter van hōb gezeen op Instagram, is det 'r maondigmōrge ôm viëf veur zeve mèt z'n zwumbōks veur het

zwumbaad in Bree stōng.
Veul leefjs, Lieve Pellens.

Effe pin haoje tot zōndigaovendj, Lieve. Tege het aovendjete zal ter waal weer bjuch zeen.

Wolf

Daag Rabbedabber, Ich staon sjerp! Es dèe noëwe wolf op hiej aan kumptj, lig ich mèt de snoët innet hoëg graas hum op te wachte! Det huuërtj hiej neet toës!
Groetjes, Pierre Sniekers.

Groët geliëk. Mèt diej 7 geite is det vreuger ouch verkiërdj geloupe. Ôm euver Roëdkapke nog mer te zwiëge.

Vleegendj verke

Bèste Rabbedabber Ich wil iëst efkes uch kontaktere, veur ich nao Gaia stap. Dèe Marc van Hover mingtj veur ziën verkes allewel Red Boel ônger het mèel.



Diej biëste make daag en nach de lamp aan. Ich doon gein oug mië toëw snachs. Het ergste van al, is

det ze verdomme ouch nog echt vleugels kriège. Veurige wèk zaat mich ei verke oppet daag van heure stal! Veur mich is de maot vol! Trök gewuuën water bie het voor, en angers gaon ich wiejer ter mè! *Vriendelijke groete, Jo Craegs*

Neet te geluive, Jo. Gank dao mer mè wiejer, want det kintj neet good zeen. Ôm te beginne veur de priës van het verkesvleis, want dèe Red Boel is neet goojekoup!

Lèevesgevaorlik

Bèste vrunj vanne Rabbedabber, Dao liktj ôs get op ôzze lèever, en dits kiër is het gei beer. Dèe Peter Cremers, waat is det veur eine mafketel?! Biej dèe Jeroen Meus klage de luj detter teveul boter en zaot gebruuëktj, mer bie het Cremers geit het 'r nog veul ôngezônjer aan tów. Gei gevaor veur de kollesterol,



mer veur 't gezich en de behaoring. Biej de lèste kiër koke mèt de Landelikke Gilde haaj ter ein lès 'sjowkoeking' geplendj. Waat eine vunkelèer is dèe Pé! "Kôm mer get korter, det gèe good zeetj wiej det ich het presies doon!" huuër ich hum nog zègge. Wèe mèt ôs snoët good kortbie die ketels, en opins ein stèekvlam zèg ich dich! Neet normaal! Hiël de snoët verbrandj en ôs winkbrauwe weg gesjniktj. Gelökkig koste wèe drek blusse mèt ei pötje beer!

Aangebrandje groete, Ruud Vanaken en Ed Smeets.

Gèe môtj neet drek de sjöldj op Peter stèeke, jônges. Heet ma bjuch uch neet geliërdj gein sjeetjes te laote inne buurt van ope veur?

De koers is van uch

Bèste Rabbedabber, Ich sjaam mich deep. Ich hób ter zelfs van wakker gelèege. Mië broor en ich hóbbe veurig jaor gein Runj van Vlaondere evenement gehaoje bjôs aane koëj. Het waas ôs get veul gewore en wèe hóbbe den mer aan ôs eige penskes gedach. Fout nateurlik. De koers is neet van ôs allein, de koers is van uch en van ôs allemaol! Gèe höbtj mich altiëd de nuuëdige aandacht gegèeve in uch gezèt, dus ich wil het ouch gèer in deze Rabbedabber mèt eine lèezersbreef kinbaar make. Het geit trök door, of wiej ze in Frieslandj zègge mèt de Èllefsteedetochtj: it giet aon! De kômendje Runj van Vlaondere is het weer volle bak op ôs erf oppe Basdônk. Ich zörg weer veur èete, drank en ambiejaos. De bend is weeral geboektj! Ugge Vorst zulle wèe veur de gelegenheid ins vriej haoje, zèk hum det mer. *Grtjs, Pieter Vanhoef.*

Fijn desse ter zoë rechoët rechtaan veur oët kums, Pieter. Wèe vergèeve het dich. Wèe zulle zörg detter ein delegasiej Rabbedabbers aaf kumtj, en de Vorst leutj bie deze al weite detter smiddes neet werm zal èete. Kwesitie van plaats genôg te hóbbe.

Opgewirktj

Bèste Rabbedabber, Ich vinj het sjèemel det gèe mich dit jaor neet zeet kôme intervjoewe. Indertiëd toen ich nog bjôs inne hoof mèt Koen Quix aan't vroete en bujelle waas, stôngtj gèe oppet gelèeg. Mer noë, noë det ich mèt Baeten Vinopolis de wiëhanjel van Goyens oët Gink hób euvergepaktj, blinktj gèe oët in aafwezigheid. Ich bèn mich begôt vollebak aan 't opwirke en ich kin eeder publiesieteit good gebruuëke! *Groete, Brecht Vanhoef.*

Prefiesiejat, Brecht. Dich bès eine kastaar! Eine echte wiënbaron aan 't wèere! Wèe zulle volgendj jaor ins kôme preuve.

Fomo

Hallo Rabbedabber, Ich bèn, mèt de vastelaovendj in het versjeet, tot inzicht gekôme. Ich hób zoëwiezoë, det weit ich van m'n eige, last van eine dwangmatige drang ôm wirkelik everal miëne kop te laote zeen. Mer al diej sjikke zittinge binne ôs gemeindj hóbbe ter veur gezörgdj det ich anger ekts de preezaos hób aafgebloaze. Ich kôs neet weg, sjrik ôm get te misse. Naoderhandj haaj ich den weer spiët det ich neet op 3-4 plaatse ekstra bèn kinne

VERVOLG
LÈEZERSBREEVE,
SMSKES, EPKES
OF MEEJLKES
AANE RABBEDABBER!



gaon kiëke, diej aovendje. Ich höb klaorbliëkelië last van FOMO: fiër of missing out. Ôs Lieve zeet mich det al jaore, mer ich zaat in ein ôntkinningsfaze.

Bjuch inne vereiniging zeen ter ouch luj diej veul op stap gaon, en diej neet heivis kinne. Wiej losse zië det op?

Groetjes, Jo Brouns.

Volhaoje, Jo. Oëjts kumtj DOMO: dzjoj of missing out. Det is efkes oppe tenj biëte, det weite wèe. Op Goegel vinse get tips ôm ter bèeter mèt ôm te kinne gaon. Probeer mer ins!

1+1

Daag Rabbedabber, Ich hoop det ich ins efkes mië beklag kin doon in uch gezèt. Waat eine zeiver waas mich det lèst, mèt det polletiek korrekt gezwets. Jupiler gaaf eine bak gratis, esse eine bak gings koupe. 1+1 zèk mer.

En hopla: al sting op stelte. Det kos neet, det mocht neet, det trok op niks, det zat de luj aan ôm te drinke en ich weit neet waat nog allemaol. Es ter ein aksiej is van Dreft desse 2 fesse kriegs veur de priës van 1, gaon ich toch ouch neet aafwasse wiej eine dulle?!

Groetjes, Ed Smeets.

Laot ze mer zèege, Ed. Wèe weite waal bèeter. De bès wèem desse bès, en de duis waat desse kins. Zèg det Teije oët Biësel het gezag heet!

Gastrol

Leefste Rabbedabber, Ich wil gèer ins efkes mië hart luchte euver ôzze Roland. Dèe speeltj de lèste tiëd everal mer ein gastrol. Biej Amesco eeder wèek mer ei paar eurkes te gast, den nao TISM ôm dao get in ein gastrol de gaste biej te staon. Het is al zoë erg gewore detter gaste van TISM biej Amesco het wirk môtte kôme doon. Eeder wèek staon ter gaste biej ôs aane deur diej mich vraoge of dèe relleijotto van Danny Kunnen neet te koup is. Dao môt Roland eigelik



ein rolkoëj in lasse, mer det speeltj veur hum neet mië zoë ein rol. Hèe zouw mich trouwes bèeter get mië helpe, door ins ein 'castrol' te helpe aafwasse!

Leef groetjes, Petra Thijs.

Wèe zulle het hum doorgèeve, Petra. Of detter ter get mèt geit doon, det is ein anger paar môwwe...

Lachtdrökrekord



Bèste Rabbedabber, Op 23 jannewariej haaje wèe in Belsj ei noëw lochtdrökrekord. Inne veurmiddig sjoot de lochtdrök de huëgdje in en eedere wèerman of wèervrouw ging door het gek hèer. Det vônje ze allemaol sjik, het kwaam oppet noëts en het stông in het lank en het breid inne gezèt, staags trop.

Ich wil het fiëst neet vergalle, mer det is dus allemaol feejk noëts. Wèe wore mèt ôs fitsklupke gaon rieje, en ich reej achter Raf toen het gebeurde. Niks lochtdrökrekord. Dao kwaam in ein fraksiej van ein sekond veul te veul gaas ter biej inne atmosfeer. Ich hing van bove tot ônger vol van waat biej dèe gaas zaat...

Ich dach: ich meldj het uch efkes. *Vriendelikke groete, Wout Hoeken.*

Wèe kinne ziën reputasiej, Wout. Mer detter nog oëjts ei rekord zouw brèeke, det geit zelfs ôs ôs klekske te bove!

EINDE!

Kokteejls op Scheyerveldj!

Veurig jaor in mei sjrikdje hiël Scheyerveldj op! Op eine nacht goëjdje dao ei of angere wuiles mèt ein bivakmöts (of wore het ei paar wuillesse?!) eine Molotofkokteejl door de vinsters van eine otto. Dikke sjaai! Wèe vanne Rabbedabber zeen begaon mèt de luj en ginge langs veur eine standj van zake.

Rabbedabber: Daag Mat. Wiej geit het òngertösse mèt dich?

Matje Deben: “Det geit. Eine noëwe jònge okkaziej van bie graasj Gielkes in Biësel, zoë-es gèe zeetj. Ich höb get korting g’hadj in ruil veur get stikkerreklam oppe achterroët. Miëne angere otto is veurig jaor verenneweerdj door ei stel hoeligans! Inne gezèt stòng det het de familiej Chouik waas diej mèt de sjaai zaat, mer det kloptj neet. Feejk noëts! Het waas miën kërke det in lichterlaaje stòng!”

Rabbedabber: Wèe weite het. Iëwige sjanj! Wèem zouw zoë get noë toch doon? En den nog in Scheyerveldj, eine röstige naober.

Matje: “Och kôm, det wètj toch eederein! De pelisse zochte al drek in Biësel nao meugelikke verdachte. Diej dachte det het ein of anger vraakaksiej waas van luj oët Biësel òmdet ich noë in Kinder woën. Mer ich kin miën dörp en heur minse: diej drage mich op henj! Diej zouwe zoëget vanzelleve neet doon. Ich weit waal bèeter! Diej pipo’s van Maaslandj Noordoost: dao môtte ze gaon zeuke!”

Rabbedabber: Waat zègs dich noë?

Matje: “Diej braodhoonder. Ich weit het zeker! Det is allemaol begos mèt ei lek bjôs bie HOM. Wèe haaje dao nog eine zak of 33 òngeblustje kalk ligge veur lijne

mèt te trèkke. Wèe höbbe het zoë al neet breid, dus ich dach: maak det mer sjoën veur en nao op. De vèrf is al deur genôg. De aafspraak waas òm dao euver te zwiège, mer toen heet **Tamara Smolders** heure môndj veurbiej gekaldj tege **Lut Vaneygen**. Lut zag het door tege **Vera Eerdekes** en ouch diej kôs heure môndj neet haoje. Veur wèe het wiste wis nateurlik hiël MNO het, en den zeen ze gaon bletsje bie de bôndj in Brussel! Flauwerikke!”

“Ich bèn toen drek in gank gesjote òm ein iëzersterk verdedigingsplan te sjriev. Wèeke aan gewirtj! Ich ging op maondigaovendj nao **Peter Nies** det dèe mich de dt-foute ter kos oët hole en toen ich trök kwaam höb ich diej pepeere in miëne otto laote ligge. Det heet dèe **Lorens van Werts** nateurlik gezeen. Dèe kumptj waal miër spiejonere bjôs inne naober. Òm ei lank verhaol kort te make: staags trop sting miën ottooke aafgefiktj veur de koëj. Het stònk wiej eine barbekjoew van **Thieuke van Moledörp**. Alles nao de kloëte! Ich höb den mer dik tege miën goesting gekarpoëldj mèt **Jo Brouns**, dèe ouch in Brussel môs zeen.”

“Zònger veurbereiding wètse het waal. Ich höb dao oppe bôndj oët



miëne nak ligge zeivere det het geine naam mië haaj. Zaak verlore nateurlik, en HOM heet aardig kinne dokke. Sjanj!”

Rabbedabber: Amai, Mat. Det is nogal ein historie. Is òngertösse de windj al weer get gaon ligge? Zeen de ploëje al get glad gestreke?

Matje: “Gaon ligge? Glad? Det meintj gèe toch zelf neet! Òm het mèt de weurd van Rinus Michels te zègge: voetbal is oorlog. Noë zeker!”

Wèe vanne Rabbedabber dinke det het missien toch ins good is òm mèt de twië klups de köp biejein te stèeke en òm ins same mèt de besteure op tiëmbilding te gaon. Wèem wètj waat het geuftj. Al hope wèe neet det het dao den ouch oët de handj löptj en det d’n eine d’n angere te lank köpke ònger dôwtj in het zwumbad. Want den is het weer mizeriej!



Jan Moubax



90 gewore!

Jan Moubax is neet lank geleeje 90 jaor gewore! Det waas ei groët fiëst inne Sevesstraat, boë-op wèe vanne Rabbedabber ouch genuuëdj wore. Wèe ginge dao nateurlik gèer op in, drônke same ei borrelke en höbbe nog ins oëtgebredj euver vreuger gerizzeneerdj. En **Netje**, diej sjödde hum in en diej bleef hum insjödde!

Jan: “Ah dao zeen de men vanne Rabbedabbers! Gèe zeetj nog van de alte kammerade, boë nog good blood in zitj! Ich vinj het fijn det gèe ter zeetj, eederein is hiej welkôm! Zoë heet ôs moojer het ôs vreuger geliërdj: allemaol ein oëtneuëjing!”

Rabbedabber: Altiëd weer bliej es wèe hiej bjuch moge zeen, Jan. Mèt uch verhaole van vreuger en uch anekdots. Gèe kintj wirkelik alles en eederein.

Jan: “Kôm, gèe môjt noë ouch neet teveul het wierouksvaat bove hole, mer waat waor is, is waor! Det moogse zègge. ’t Is altiëd zoë gewèest: pestoër wis al, mer Moubax wis alles!”

Rabbedabber: Profiesiejat mèt ugge 90ste verjaor daag! Det is neet niks!

Jan: “Det is ein aardig tiëdje det wèe hiej al moge rônjdj raoze, det kloptj. Ich weit nog det Nètje en ich hiej zeen kômme woëne in ’65. Toen waas ich nog hanjeliër in potlode en wiks, en miën

vorderinge wore niks! Toen koste wèe het Seveshuuëske van hiej oët nog zeen ligge. Daonao is alles vol geboedj. Mer det is neet erg, ich höb gèer veul volk rônjdjôm mich. Waat zouwe de bosse einzaam zeen, es allein de bèste vogels zônge!”

Rabbedabber: Het iëste waat ôs



opveel, waas dèe groëte kammejaor van Coca Cola op uch gelèeg. Det is nogal get!

Jan: “Toen ich brouwer waas, höb ich Coca Cola mèt oppe kaartj gezat hiej in Belsj. Dao zeen ze mich nog altiëd dankbaar veur. Dao hange nog foto’s van mich in diej kantoëre. En toen ze wiste

det ich 90 waas gewore, zeen ze mèt hiël de klômmel op hiej aan gekômme. Det is trouwes neet d’n iëste kiër det ich hiej eine kammejaor op het gelèeg haaj. Ich waas pas op pensjoen en wèe haaje ei wèspenèst hange aane koëj. Ich de brandjweer gebeldj en diej kwame aaf. Ze wore zjust op oefening. Ich zèg: zèt uch effe. Drink ei pintje beer. Efkes later belle ter anger brandjweerluj. Zègge diej waat bieje ôs zate: wèe höbbe beer hiej! Hopla: weer eine kammejaor dèe aaf kwaam. En zoë ging det wiejer. Op het lèst stông het hiej vol mèt brandweerwages. De hiël kazern van Mezeik zaat hiej inne hoof. Netje is 3 kiër nao Jaak Nies môtte gaon ôm beer bieje te hole!”

Rabbedabber: Weer ein sjoën anekdote, Jan. Det môt toch sjik zeen gewèest.

Jan: “Det waas ouch sjik. En dao is zoëveul waat sjik is. Hiej is het te doen, jônges, hiej en noë môtj gèe lèeve en geneet. Dink ter good aan: de höbs achter ein liëkkist geine remork hange!”

Sjoën weurd van eine echte Kinderse wuiles, ôm dit intervjoew mèt te eindige. Wèe zeen nog efkes blieve hange bieje Netje en Jan, boë het alzelèeve geneete is. Jan, names de Kinderse karnaval: eine dikke profiesiejat mèt ugge 90ste, en nog veul gooj jaore!

EI GEHEIM RESEPT VAN POOL FRIT!



Ôzze eige **Pool Frit** zal eeder jaor ein van ziën geheim resepte priës gève diej hêe gebruuëkdje inne frituur vreuger, in Elkerlyck en inne Heerlijkheyd.

Pool heet ouch dit jaor weer zië bèst gedaon veur uch en veur ôs. Hêe luuëtj noë al weite det hêe volgondj jaor, es de Rabbedabbers 4x11 jaor bestaon, groëts geit oëtpakke. Wêe zeen benuuëdj! Iëst mer ins klaormake waat 'r ôs deze kiër verklaptj: runstông mèt Madèerasaus mèt sjampienjôngs, in of kurriesaus!

Waat môtj gèe hole inne winkel?

- Runstông
- Kippeboejông
- Pèeperbölkes, laurier, tijm
- Poor, selder, uënje, moëre
- Tematpuree
- Barbejoewketsjup
- Ein doës ananassjuuëve
- Roum
- Madèera en kônjak
- Sjampienjôngs
- 2 appele of eine pot appelekômpot
- Kurriepoejer
- Wêe gaon ter van oët det gèe pèeper, zaot, boter, oliëfolie en bloom al in hoës höbtj, en water zal ter ouch waal oët ugge kraan kôme...

Waat môtj gèe doon veur eine lekkere runstông mèt ein keus oët 2 sauze van Pool Frit oppe taofel te kriège?

De runstông!

- Zèt de tông op in kaod water en laot det 15 menuute koke. Sjöp regelmaotig het voël sjoëm aaf mèt eine pollepel en goëj det mer drek inne voëlbak. Speul nao 15 menuute de runstông good aaf mèt water en laot hum daonao good oëtleeke.
- Lèg de tông in eine ketel en völ dèe mèt water

tot de tông ônger water stuit. Doot dao get blökskes kippeboejông bie, en ouch get zaot, pèeperbölkes, laurier, tijm en greuntje. Diej greuntje det is: poor, selder, uënje, moëre.

- Bring de tông aane kook en laot ze op ei zaocht veurke röstig gaar wèere. Det geit euver 2,5 tot 3 oor.
- De runstông is gaar esse ter mèt ein sjerpe spies kins doorstèeke zônger desse weerstandj veuls.
- Hool de tông es ze gaar is oët de boejông, laot ze ei bitje aafkeule en trèk het vel ter van aaf. Es ze good gaar is, geit det wiej niks.
- Lèg de runstông in ein kôm en bevochtig ze mèt gezeefdje boejông.

De Madèerasaur mèt sjampienjôngs!

- Bevochtig ein braodpan mèt get oliëfolie, eine groëte lepel tematpuree en ei bitje barbejoewketsjup.
- Zèt det op het veur, reur good en bevochtig mèt get kookboejông vanne runstông. Blusse mèt get Madèera en kônjak.
- Binj de saus mèt ei mingselke van water en bloom tot ze de gewinste dikdje heet.
- Zeef de saus en smaak ze aaf mèt gèt pèeper en zaot.
- Garnituur make wèe mèt gesneeje, gaargekookte sjampienjôngs.
- Wirk de saus aaf mèt ei sjeutje Madèera, get kônjak en get roum. Miljaar det is lekker! Kumtj uch ouch het water al inne moël?
- PS: Is de saus neet roëd genôg? Doot 'r den gewuën nog get tematpuree bie. Vèerdig!

De kurriesaus!

- Sniej get uuënje fiën en stoof det aan in boter en oliëfolie.
- Sniej ein hawf doës doës ananassjuuëve in stökke en doot diej dao ouch bie.
- Good reure, en kruise mèt zaot, pèeper en veul kurriepoejer (Madras is ei good merk)!
- Blusse mèt ananassap en kippeboejông.
- De kins ter eventueel 2 appele in klein stökskes bie door, of eine pot appelekômpot.
- Good blieve reure, en laote doorkoke (15 menuute) op ei zaocht veurke.
- Binj mèt ei mingsel van water en bloom.
- Nao het koke moogse de saus mikse (mèt eine mikser) en zeve.
- Smaak aaf mèt pèeper en zaot en door 'r met get roum bie!

SMAKELIK!!!

Kinderse influuwensers doon het dich veur!

De lèste jaore is het flink kôme opzette: influuwensers! Det zeen luj die reklame make òm get te gaon naodoon of veur dich get te doon aansjaffe. Ze wirke veural vieja Instagram, boè ze niks es foto's poste òm dich wildj te kriège veur het ein of het anger. Sômmige van diej influuwensers wille ein raasj op gang trèkke.

Ouch in Kinder zeen ter ei deil influuwensers aktief. Wèe ging ins rônjd naaze op Instagram, en kwaan get gekkigheid tege. D'n eine al zotter es d'n angere.





Tony's Meubelke geit ooriejentaals!

Het is eederein vas al opgevalle: Tony's Meubelke heet ein hiël metamorfoos ôngergange. Det is bekans de Tasj Mahal gewore, en hêtj sins kort Tony's Tempelke! Naovraog liêrtj ôs det **Tony**, sins detter zich ein Filipijns vrouwmîns heet biejein gedaon, hiël ômgelagte is kwa smaak. En det veulse en preufse ôngetosse aan alles in en rônjd ziên zaak, diej sins kort volledig ooriejentaals is verbôwdj gewore. Tony heet zich euveriges volledig bekiêrdj tot het Boedisme.

Veur eine divan môsse al neet miê bij Tony's Tempelke zeen. Dao zeen allein nog mer matte en kôssete te koup, ôm dao in kleijermakerszit op te gaon zitte. Bij het meubielêer veur de keukes zeen ouch luuëkskes te kriêge, ôm te installere tösse keuke en lieving. Zoë kinse gemakkelik het ète doorgêeve van de ein nao de anger ruuëmdje.

Boeda's zeen te kriêge in alle meugelike maote. De meiste modelle kinse zoëwaal boëte en binne zètte en zeen dus wêrsbestendig.

Dao ligtj ouch eine groëte viêver achterin boë desse vèsse kins koupe. Allemaol kois in alle soorte maote en kleure. Ei kapitaal waat dao rônjd zwumtj!

Mathy vanne Kwasp, hiltj het allemaol nauwlêttendj inne gater. "Dao stoptj dao eedere maondj eine kammejao mèr rômmel oët China, Indonesië en Thailand. Dêe kraom weurdj missjien waal hiej verkoch, mer det viltj neet ônger de nummer 'WINKELHIEJ'. Ich vinj det mer niks!"

Wêe vanne Rabbedabber vinje het sjik! Zoë get anger kulture liêre kinne, det heet waal get. En of de rômmel noë van hiej is of van op ein anger: det muktj toch gaar niks oët! Veul sukses gewinstj aan Tony's Tempelke!

Môppe

... **Raf Nijs** kwaam bij **dokter Bullen**. "Zêk het ins, Raf," zeet d'n dokter. Raf kiêktj get verlêege veur zich oët en antwoordj: "Ich zouw gèer ein penisvergroëting laote doen... 't Môt neet god-wêtj-waat zeen mer ich zouw toch gèer eine gemiddeldje piemel hóbbe. Diej van mich klaagtj al jaore det ze neet aan heur trêkke kumtj tösse de lakes..." Fôns heet alle begrip veur Raf z'n probleem. "Ich kin dich det waal regele vieja miêne kollega in Mezeik, mer det is toch eine groëte kost." Raf vreugtj waat zoë ein ingreep den waal môt koste. "2000 euro veur eine centiemèeter, 5000 euro veur 3 centiemèeter en veur 10 centiemèeter môsse toch tèle op 15000 euro. En 10 centiemèeter is het maksimum waat wêe doen. "Det gaon ich toch mer ins efkes mèr **Tieneke** besprêeke," zeet Raf. "Ich laot uch môrge get weite, dokter." Driej daag later heet dokter Bullen nog altiêd niks gehuêrdj van Raf. Hêe beltj hum den mer zelf op en vreugtj wiej het zitj. Raf antwoordj teleurgestêldj: "Zelf waas ich ter hiël entoezjast euver mer **Tieneke** zag doot mich veur det geldj mer ein noë keuke!"

... 't Zeen modern tieje! Op Agropolis zeen ze begos mèr de kweek van ein noë greuntje. Eine gember dèe nao niks smaaktj en toch verkôptj wiej eine trein. Allein mer ômdet 'r gemberneutraal is!

UNIZO awards 2.0!



Ein jaorlikse traditiesiej in het veurjaor: de UNIZO-awards. Zoë-es bie eeder awardsjow is het ouch hiej ein fiëst van zeen en gezeen wèere. Ôs Kinderse zelfstandige en bedriëfslieijers goëje ôngerein mèt get bleumkes nao d'n eine d'n angere en vleege veur de gelegenheid flink inne kava en inner beer.

Aafgeloupe jaor wore ter echter naoderhandj get krietisse geluide te huuëre hiej en dao. Wèe vanne Rabbedabber ginge efkes bie **Bettina Vandleef** langs veur ein korte reaksie: “Dao staak inderdaad hiej en dao get genaöl de kop op. Dao wore ter diej het UNIZO-besteur het verwiët maaddje det het toch allein mer ‘de vriendjes van het besteur’ wore diej get wönne. Of det ‘de kleintjes’ toch neet mèt tülle. Dikke kwatsj nateurlik, mer es fleksiebele ôngernemers gaon wèe waal get klein aanpassingskes doen ôm get miër lèeve inne brouweriej te bringe. Get miër de vlam inne pan te bringe dus. Probere ôm

gein momente te hōbbe mèt ein begrafenisstōmming. En det gaon wèe doen door nève de UNI-K award en de SPOTLEECHT award ouch 11 nèvekategorieje in het lèeve te rope. Ôm in aanmerking te kōme veur zoë eine WINKELHIEJ award, hoofse neet veul te kinne of te doen. Perfekt op maot van de kleiner KMO's of de hoës-, tuin- en keukebujelèers dus. De hoof in sōmmige gevalle zelfs geine hanjelèer of lid van UNIZO te zeen. Wèe dinke mèt diej aanpassing van ôs groëtsjalig UNIZO perseniëlsfiëst, en mèt de keeze veur **Twan Smeets** es presentator-zanger, de boel behuërlik nao ein hoëger nivo te hōffe. De Stegel zal dinkelik te klein zeen, dus wèe rëekene op Jan-Arie De Jōng veur ein van ziën sijkste tente.”

Wèe vanne Rabbedabber dinke det dees UNI-K awards 2.0 gaon inslaon es ein bōm! Wèe koste bie het boëte gaon bie Betinna nog stiekem efkes snoestere in heur UNIZO-notiesiejbeukske, boë-in

al get gekribbel stōng euver ein aantal van diej noë kategorieje. Ômdet wèe ter al miër bōnk op zaate in het verleeje es het geit euver veurspellinge, hōbbe wèe achter de kategorieje alvas ôzze favoriet gezat! Wèe wachte same mèt uch in spanning aaf waat het geit gèeve strak...

- Beste noëwkōmer zōnger BTW-nummer: **PIZZA JAPE**
- Best dreijendje verdoke hanjelspandj: **de graasj van Riëk van Kaat veur de heropening van Kaffee Sport**
- Meist ôngedōldige, gejaagdje noëkōmer op Leuerbrook 2.0: **Bart Pierson Interjueurbōw**
- Hëlste steuner van neet-kommersjeel organisasies bie deur aan deur verkoup: **Bosmans senior**
- Bèste ‘wiej maksimaal gebruuëk make van besjikbare oppervlaktje’: **Bert Stephani oët Biësel**
- Sjikste perseniëlsoëtstap: **Vanhove Houthanjel verplichtj eederein mèt de tōng tot oppe grōndj aaf te zeen oppe 5 km van Vitamine K**
- Bèste reklaam 2019: **KBC verhuuëgdj tarieve mèt eine knal**
- Meiste kans op missing bie ein bestëlling vanaaf 5 stōks: **Alex van De Sjans**
- Drōks bezatte parking aan ein hanjelspandj: **Serge Leen Carservice**
- Snelste saörvis: **Tony Vanwijck sanitèer es het dringendj is**
- Langzaamste saörvis: **Tony Vanwijck sanitèer esset neet dringendj is**



Stjuuwards aane Maas dringe euverlast trök!



De Maasplass, inne volksmôndj bèeter bekindj es grindjgaater, trèkke eeder jaor veul volk. Vèssers, surfers, luj mèt hunj, fitsers, wanjelèers en num het mer op. Helaas kôme ter ouch veul Hollènkers en Duitsers op dao aan. En gèe veultj hum al kôme: dao zitj eine houp ônaangepastj, ônbelèefdj en ôngemeneerdj krapuul tösse. Es gewuuëne pellis stuise kômpliët machteloos. Eine gewuuëne pellis kumptj meital te laat, en es ter al oppe tiëd is kintj 'r zoë good es niks doen, of het zouw het sjrieve van ei prosses zeen boë naoderhandj toch niks van in hoës

kumptj. Oppe gemeindj wore ze det zoë kaök, det ze sirjeus hóbbe ingegrepe. Sinds veurige zomer loupe ter aane Maas zoëgenaamdje 'Maasstjuuwards' rôndj. **Dirk Bogie** is ein van diej wuillesse, en dèe ginge wèe bezeuke veur ein intervjoew.

Rabbedabber: Daag Dirk. Vertèl ins. Waat zeen diën take es Maasstjuuward?

Dirk: "Goojendaag. Eine Maasstjuuward, det kinse nog het bèst vergeliëke mèt ein kruuësing tösse eine Ninja Turtel, eine psicholoog, eine gooje kammeraad dèe dich zjus oppe tiëd gooje raod geuftj veur desse get stôms geis doen, en ei wèers vrouwmes det dich flink ônger diën kloëte geuftj esse te laat bjuch bès gekôme zônger op veurhandj get te laote weite."

Rabbedabber: Howla! Det is nogal get. En viltj het dich ei bitje mèt?

Dirk: "Gein vets. Het veel mich tot ei paar wèeke geleeje ferm tege."

Rabbedabber: Det is minder. Boë laag det den aan?

Dirk: "Toen wèe begoste es stjuuward, hóbbe wèe eine hiële oëtlèk gekrege van waat wèe moste doen, en wiej wèe det môste

doen. 't Kwaam ter op niër det wèe môste kalle, kalle en nog ins kalle. Teveul psicholoog en kammeraad dus, en te weinig Ninja Turtel en wèers vrouwmes. Het ergste van al waas den nog, det es het vroluuj tösse de 20 en 30 jaor mèt get of waat oëre en puuj wore, wèe rechtstreeks nao de bôrgemeister môste belle. Det kalle wou ter zelf doen. Waat eine flauwe, waat eine sjèele zeiver."

Rabbedabber: Mer ôndanks diej tegevallendje iëste maondje es stjuuward, bèste ter neet mèt gestoptj, toch?

Dirk: "Kloptj wiej ein bös! Ich veul toch ôrges det ich in dees taak miën ei kwiët kin. Oppe sjoël môt ich mich altiëd mer inhaoje tege diej rotjung, aane koëj hób ich nul komma nul te zègge, mer hiej aane Maas, bèn ich baas! Ich bèn mich zelf mer get gaon bewaopene, zoëdet ich miën taak bèeter kan oëtveure. Vanne gemeindj kregte wèe begot allein mer folderkes mèt informasiej mèt! Folderkes! Ich môt d'n iëste Hollènker of Duitser nog tege kôme dèe zich opins geit veuge ômdet ich mèt ei folderke staon te zweije! Niks van, neet mèt Bogie! Vanaaf noë bèn ich veurzeen van pepperspreej, ein windjbuks, stinkbômme en van diej dikke kogellagers ôm dumpels ins otto's te smiëte! Dao weurdj neet miër gelache mèt de Maasstjuuwards!"

Rabbedabber: Det is klaor ein duudelik! 't Kumptj waal good dao, aane Maas! Veul sukses!

Dirk: "Danke! Wiltj gèe missjien nog ei folderke mèt heivis?"



**DIALEKTOËTZENDING
RADIO MONZA**

**SJEELE ZEIVER EN AMBIEJAOS OPPE
LOËSTERTOER VAN 16 TOT 23 ORE**

**GROËTE STOËT &
ACHTERAAF AMBIEJAOS INNE
BUNKER MËT DJ GEVOËN TJEU**

**VERKLËDJ BAL
@ KAFFEE DE GRENSHOOK**

20:11 ORE - INKÔM GRATIS



FIBREWARIEJ

3e wêk
zôn op 7:11

Prinsesmaondj

2020 - 370
zôn ônger 18:11

21

MONZADAAG

VRIËDIG

FIBREWARIEJ

3e wêk
zôn op 7:11

Prinsesmaondj

2020 - 370
zôn ônger 18:11

23

STOËTDAAG

ZÔNDIG

FIBREWARIEJ

4e wêk
zôn op 7:11

Prinsesmaondj

2020 - 370
zôn ônger 18:11

24

BA(A)LDAAG

MAONDIG

